

萬 有 文 庫

第二集七百種

王 雲 五 主 編

明 詩 紀 事

(一十二)

陳 田 輯

商 務 印 書 館 發 行

明詩紀事

(一十二)

陳田輯

國學基本叢書

# 明詩紀事卷十二

## 庚籤

### 沈懋學三首

懋學字君典宣城人萬歷丁丑第一人及第授修撰福王時追諡文節有郊居遺稿十卷

弇州山人續稿先生詩文不名一家縱橫捭闔往往出人意表

靜志居詩話君典少任俠兼精技勇能上馬舞丈八稍嘗出塞縱觀飛狐花馬險塞空爲曠騎追至幕南君典挾一矢命中其黨乃不敢追既登狀頭是年第二人卽江陵相子嗣修江陵方欲引以相助會奪情之舉君典貽書嗣修謂相君天子師表奈何棄綱常飽人以口實嗣修慙不能答也又貽書李尙書養河辭頗激切養河發書嘻笑而已君典乃與吳編修子道趙檢討汝師謀各上疏吳趙受杖去官而君典疏草爲人所持不果進然江陵業恨其異己而海內皆服其風節矣君典四十而天年壽不將命爾而王元美作墓表屠緯真作傳欲傳會曇陽子昇真之確至以妖夢厚誣光明磊落之君典是豈愛人以德者耶田按江陵奪情五君子抗論先後被杖君典擬救建言諸臣疏格不得上今疏存集中論者謂非擬疏之難上疏之難既未上矣存之何爲乎其貽江陵子嗣修書余見之於沈純甫南征錄中婉轉開陳不失忠告之義集反失載君典豪雋之士余閱朱竹垞詩綜施愚山宛雅所錄均不愜余意特從郊居稿中甄錄三詩庶幾見君典之豪情逸韻耳

### 敬亭望九華山

敬亭一以眺。天外九芙蓉。久矣懸清夢。誰哉啓祕封。浮雲高鳥沒。落日綺霞重。舊是仙人宅。吾將跨白龍。  
有感

生平憐俠節。世態薄狂奴。意氣千金盡。勳名一劍孤。浮雲愁李白。歧路泣楊朱。好棹扁舟去。春風自五湖。  
汪山人子建自塞上歸賦贈

塞門寒色擁黃雲。日落燕山酒易醺。春水五湖歸夢杳。尊前長揖大將軍。

曾朝節二首

朝節字直卿。臨武人。萬歷丁丑第三人及第。授編修。歷侍講。諭德。侍讀學士。少詹事。遷南禮部侍郎。掌翰林院事。進本部尙書。贈太子太保。諡文恪。有紫園草二十二卷。

共給蒲團坐

共結蒲團坐。沈沈俗慮銷。荒村羣動寂。淨土萬靈朝。響入疑空梵。聽餘轉汰寥。定知車馬客。終不耐塵囂。  
皇子百日

百日欣逢睿節新。兩宮燕喜屬芳辰。雲中鳳輦來王母。日表龍顏識聖人。瑞氣正浮三殿曉。歡聲齊動六宮春。願將多壽多男祝。歲歲年年獻紫宸。

馮琦十四首

琦字用韁。臨朐人。副使裕曾孫。萬歷丁丑進士。改庶吉士。授編修。歷侍講。諭德。庶子。進少詹事。掌翰林院事。遷禮部侍郎。改吏部。拜禮部尚書。贈太子少保。天啓初。諡文敏。有宗伯集八十一卷。

穀城山房集。北海馮公。古體淵源漢魏。而軼出於唐。近體沈浸盛唐。而致極於杜。

王錫爵文肅文章。琢菴詩以情真爲宗。次傳聲調。長篇感激沈壯。類老杜。五七言律。和雅會心。絕不如近時名家。以浮音亢節自喜。

明詩選。陳臥子曰。宗伯經術之士。雖未冥搜。亦能象合。

田按。用韁早達。留心經濟。時講筵久輟。與同官余繼登共進通鑑講義。傳以時政。尤究心當代掌故。於祖宗典謨。先臣條奏。能舉其要。謂魏相條上漢故事。可爲師法。駁駁需用。登揆席。爲沈一貫密揭而止。文章爾雅。詩兼長各體。論者謂與東阿于文定並爲海表人望云。

### 述懷

女弟纔四歲。舉步一何嫻。向人輒下拜。頗識噴喜顏。傷彼蕙蘭花。零落清霜寒。疇昔多歡悰。一一成悲端。余亦慕弘達。不能割此難。焚汝身上衣。碎汝指上環。九原長決絕。撫膺獨洩瀾。

### 壬辰書事贈別鍾淑濂張伯任

世事亦何常。慘舒遞相盪。今日非昨日。回首一惆悵。聖人久在宥。君子始用壯。漫同賈生哭。實恃漢文量。日月豈不照。雷霆未敢抗。其日風塵昏。黃雲自飛颺。侍臣盡改服。緹騎紛持杖。矯矯山陰公。尺牘還內降。

庭蓄留侯策。帝厭王陵戇。赤烏將去國。白麻別命相。省垣及選部。一時盡屏放。就中誰最賢。鍾張尤倜儻。兩生軀幹小。氣欲排巒嶂。新從上谷來。膽落臨邊將。豺狼盡已屏。藜藿誰敢傍。古來直節士。大半投炎瘴。至尊多優容。忍使居一障。視汝舌尚在。幸汝身無恙。莫忘國士遇。甯同庶人謗。所惜正士去。滿朝氣凋喪。從茲天廐馬。靜立含元仗。居然言路塞。兼虞禍機釀。傳言半疑信。蓄意多觀望。稽首辭九廟。尙欲徼靈貺。國本苟不搖。甯使臣言妄。謇予非諍臣。執經侍帷帳。吏隱類方朔。諫說慕袁盎。威顏尙不接。肝膽終難諒。知無匡世資。三山行將訪。

田按萬歷二十年禮科給事中李獻可疏請豫教元子。帝大怒。摘疏中謾書弘治年號。貶一秩調外。六科給事中鍾羽正、張棟等各具疏救。大學士王家屏封還御批力諫。帝愈怒。家屏引疾乞罷。詔馳傳歸。羽正、棟均被譴。此詩矯矯山陰公。尺牘還內降。省垣及選部。一時盡屏放。紀其事也。是時帝寵鄭貴妃子福王。幾倖踰次立。賴諸臣先後力爭。越二年。元子始出閣講學。如東宮儀。

### 雙林寺歌

長安春風能幾許。陣陣化作秋來雨。蒼狗白衣那可辨。古今榮瘁甯堪數。君不見玄明宮。君不見雙林寺。雙林寺主迹如埽。路人猶說繁華事。憶昔金貂近帝樞。轉日回天傾上都。九列有時觀進退。五侯無敢同馳驅。縱橫五鹿客。交結霍家奴。城中甲第連白虎。城外浮圖下赤烏。浮圖矯矯凌雲際。乘豹驂狸鬪神異。天中畫棟蟠龍螭。階下豐碑蹲屬鼠。天子親爲降勅書。宰臣不惜書名字。布金刻玉神亦勞。費血塗膏鬼

所忌。從來執權如抱虎。黃鉞一下無處所。半夜雷霆飛赤霄。百萬金錢歸少府。罪厚難徼帝釋靈。譴輕未  
霽君王怒。大第深沈別有人。野寺淒涼已無主。試看今日蓬與蒿。試看舊日石與牢。豪華意氣竟何在。寂  
寞樓臺空復高。黃金臺前車已覆。黃金隴中滿已撲。何處流人泣向隅。何人貴近欣當軸。一歲花開一度  
春。一年世事一回新。惟有寺前松柏樹。年年長對往來人。

田按。玄明宮。劉瑾所構。雙林寺。馮保所構。李空同。何大復有玄明宮行。余並錄之。于無垢。馮用韞有雙林寺歌。予亦並錄之。當  
時若王子衡。公孝與亦有作。俱嫌不稱。

### 去婦行送別陳南濱侍御

戚戚復戚戚。去婦長太息。欲去難爲別。後心不去甯堪眼前擲。不須逐去婦。婦去何須逐。昨日尊章偶不  
歡。今朝娣姒笑相目。等是君家婦。妾命偏難住。風雨何淒淒。不見嫁時路。郎君如浮雲。雲暗復中開。賤妾  
如流水。水去何當回。水流到東海。千里始一曲。妾行無所歸。一步一躑躅。留妾身上襦。忍名曰合歡。攜妾  
機中絲。念君衣裳單。去婦行色何草草。人情反復誰能保。束縵虛勞鄰母問。織纈自有新人好。新人貌。舊  
人心。妾命自薄君恩深。君恩深。妾何止。休言嫁婦不出里。倘君別後能相理。與君同生亦同死。

### 秋夜偶成示舍弟

一院蟲聲合。空階雁影過。疏燈人不寐。涼露夜如何。逸思秋來減。歸心病裏多。長安今夕月。應照舊煙蘿。

送公亮年丈出參閩藩

一出春明外。方知道路難。詞臣行作吏。報主敢論官。何日延津合。悲風易水寒。天街明夜月。寂寞倚舟看。  
過翠華岩

明湖看欲盡。遠寺始聞鐘。不識青蓮界。芙蓉第幾重。行披山徑草。坐對洞門松。雲際傳清梵。天香落碧峯。  
陪祀長陵

文皇陵墓枕居庸。王氣連雲正鬱葱。原廟衣冠千古淚。帝圖襟帶萬山雄。至今魚海無傳箭。見說烏號有墮弓。夜雨崆峒仙仗杳。六龍松柏尙嘶風。

冬至拜牌

去歲茲辰供奉班。中朝肅穆漢衣冠。諸方盡入天王貢。聖主親郊太乙壇。雲覆離宮華蓋轉。霜清輦道玉珂寒。虛疑咫尺威顏在。翹首天門謁帝難。

過故相第

長安變態杏煙霞。賓客紛紛田竇家。燕子已歸誰甲第。牡丹空泣舊繁華。十年黃閣沙邊路。幾日玄都觀裏花。寂寞重門車馬絕。後庭無樹夜棲鴉。

送別孝與同遊赤澗菜圃



一會何堪抵別愁。未能分手且同遊。人家雞犬桃源路。野水蒹葭剡曲舟。憶昨論心還聽雨。卽今送遠更悲秋。明年便是湖山主。期爾東鄰借許由。

送魏中丞撫晉中

千里雄關接冀都。岢嵐天外控匈奴。試看鐵騎新行塞。不比金縉遠賜胡。節制總歸中執法。威名先到小單于。塵清玉帳渾無事。獨立轅門片月孤。

送孝與東歸二首

萬里蒼煙海氣通。欲從何處望東蒙。斜風細雨長安道。賴得分攜是醉中。素衣不禁帝京塵。出鄧看春已暮春。我自倦遊君未遇。楊花如雪送歸人。

王士性一首

士性字恆叔。臨海人。萬歷丁丑進士。除確山知縣。擢禮科給事中。改吏科。出爲四川參議。歷太僕少卿。遷河南巡撫。疏辭。以原官改南。就遷鴻臚卿。有五岳遊草十二卷。

泊鄞江

錦纜牙檣江上舟。採菱歌斷雨新收。白雲半掩林皋色。紅葉初驚海國秋。水落魚龍游淺渚。月明鷗鷺起芳洲。客懷淡蕩隨流水。不倩蘆花相對愁。

魏允貞四首

允貞字懋忠。南樂人。萬歷丁丑進士。授荊州推官。徵授御史。以言事謫許州判官。遷南兵部主事。歷郎中。進光祿少卿。歷順天府丞。遷右通政。以右僉都御史巡撫山西。進右副都御史。兵部侍郎。天啓初。追諡介肅。有司理。南銓。光祿。里居。京兆。銀臺。撫晉等稿。

文起堂集開府魏公五言如秋色近重陽。飄零感異鄉。久客鳳凰臺。秋深鴻雁來。浮名不可戀。芳草又萋萋。離心不可道。楊柳自江干。工於發端。若一官來白下。五字學黃初。一路梅花發。滿江春水流。明時俱逐客。佳節是他鄉。白首爲郎意。青尊送客情。關河千里外。風雨五更深。微雨催寒食。芳花滿故園等聯。悉爲佳境。

靜志居詩話。見泉以直節聞。相傳其子廣徵甫登賢書。來省其父。見泉閉之廨中。不許就禮部試。曰。此破犖犢也。一得志。必墮我家聲矣。後果然。詩近曠疏。論者謂遜其弟懋權。

對落花有感

不堪南國裏。又是落花時。興逐少年去。春歸旅客知。病多因止酒。愁到強吟詩。寒食故園日。芳菲憶滿枝。

雨後憶弟

荏苒秋云暮。淒涼客不禁。關河千里外。風雨五更深。苦憶連床語。微爲擁被吟。病身歸未得。知汝此時心。

漢江逢費侶鶴年丈時由掌科出憲川西

春花分手薊門煙。錦纜相逢漢水邊。一唱郢人回白雲。千盤蜀道入青天。劍光忽動豐城紫。關吏能傳柱

下玄莫以論思耽侍從。少年驄馬幾人先。

### 酬寄邱太史

西來春水接天流。楚客歸帆不待秋。爲有江頭芳樹色。時時回首仲宣樓。

### 鄒元標一首

元標字爾瞻。吉水人。萬歷丁丑進士。觀政日。以建言謫戍都勻。召授吏科給事中。復以言事謫南刑部照磨。遷南兵部主事。改吏部。歷員外郎中。罷官。起大理寺卿。遷刑部侍郎。進左都御史。贈太子太保。吏部尚書。諡忠介。有願學集八卷。存真集十二卷。

田按。忠介以論江陵奪情。謫戍吾黔。黔士之從公遊者。若陳給諫尙象。余羣縣顯鳳。吳解元鋌。各有成就。都勻爲公戍所。勻守段孟賢。葺鶴樓。張公讀書樓。以居。公朝夕課諸生。暇則尋龍山。盤谷。諸勝蹟。幾忘其爲萬里戍客也。一夕。江夫人釀酒盡。夫入曰。吾鄉謂釀赤爲紅娘子。主大吉利事。黔亦有此語。吾夫婦可幸生還也。未幾。果有給事之召。公去。勻十五年。門人思之。卽其講學處。建南皋書院祠之。至今俎豆不衰。

### 春日赴白鷺洲

春水引行舟。桃花夾岸流。沙明栖一鷺。雨過語雙鳩。濁酒澆孤興。青山笑晚愁。萋萋芳草綠。無語對江洲。

### 余繼登二首

繼登字世用。交河人。萬歷丁丑進士。改庶吉士。授檢討。進修撰。歷中允。少詹事。掌翰林院事。進禮

部侍郎擢本部尙書贈太子少保諡文恪有淡然軒集八卷

四庫總目繼登詩文平正淳實無萬歷中佻薄之習

田按萬歷二十二年帝從禮部尙書陳于陞言勅修本朝正史遂命于陞及尙書沈一貫少詹事馮琦及世用爲副總裁而閣臣總裁之世用疏言纂修帝紀有不可不自爲一紀者建文君是已有不可不必爲一紀者恭穆獻皇帝是已世躋其論惜于陞尋卒史亦竟罷世用文章樸直切於時用奏疏尤其所長世用淡然軒集馮用韞序而刻之稱其文如孤峯斷崖居然千仞又如玄珠璞玉不假雕飾而磊落適上之氣時溢毫楮詩亦時有合作

### 送張端叔大參之大梁

河橋三月暮春色曉氤氳黃鳥方求友青樽卻送君魂銷燕市酒心折太行雲兄弟飄零甚天涯忍更分

### 宮怨

屏帷向月夜窗幽坐對星河黯自愁獨有齊紈伴寂寞涼風又到殿西頭

### 馮夢禎三首

夢禎字開之秀水人萬歷丁丑進士改庶吉士除編修以事謫官量移南國子司業歷右庶子拜

南國子祭酒有快雪堂集六十四卷

列朝詩集開之詩文疏朗通脫不以刻鏤求工

櫟李詩繫開之登臨古什追蹤陶謝律絕雖多豔體亦有生香真色之妙

靜志居詩話公儒雅風流名高三席歸田之後間娛情擊伎爭歌酒讌望者目爲神仙中人詩亦不蹈時習五古能盤硬語尤

見意匠經營。同譜若沈君典、屠緯真，皆不及也。

廿五日曉泛山行歷龍井諸處還孤山湖

清旦踐夙期。泛舟益新侶。和風沁肌骨。初旭媚空水。水窮山色親。徑曲樹容美。龍泓晝常陰。竹閣晴疑雨。返策循廣隄。沿流越孤嶼。落日纈通川。紅芳爍羅綺。青帝無回驪。春物甯淹晷。濃淡準疇昔。羽停情靡止。餘不溪聽夜雨。

尋山洽在晨。枕流眷茲宵。夢斷籟如引。情積聲靡遙。簾虛愜微涼。波響滌餘囂。寤寐咸有契。甯得滯流潮。大婚禮成紀

遙望長秋屬帝宮。天門瑞氣鬱葱葱。金輿日麗趨中使。絳節雲開引上公。彩鳳齊鳴三殿曉。天桃並發萬年紅。甯論漢代昭陽寵。還嗣周南窈窕風。

顧紹芳一首

紹芳字實甫。太倉州人。萬歷丁丑進士。改庶吉士。除檢討。遷贊善。有寶菴集八卷。

省中觀芍藥

芍藥天邊種。當階裊數枝。宮雲依檻溼。蜀錦帶煙披。態爲東風弱。香從湛露滋。花中誰更豔。春後肯言遲。伴日臨仙液。含情媚鳳池。憑闌寄情賞。爾亦倍恩私。

姜士昌二首

士昌字仲文丹陽人尚書寶子萬歷丁丑進士除戶部主事歷員外郎中出爲陝西副使進江西參政以言事鑄三秩爲廣西僉事再謫興安典史天啓初贈太常少卿有雪柏堂稿

金山寺

煙雨片帆收閒尋物外遊鳥歸吳苑樹僧下廣陵舟海近寒潮壯天空木葉秋江流足禪意對此共悠悠

謁延陵季子祠

末路誰堪問維舟獨謁君空山響流水古渡駐寒雲醜酒酬高誼捫碑惜斷文遺風如未遠吾輩挹清芬

張維新四首

維新字憲周汝州人萬歷丁丑進士除冠縣知縣擢兵科給事中改禮科出爲湖廣參議改山東歷山東天津陝西副使陝西參政按察使進布政使有餘清樓稿二十五卷

田按憲周不以詩名而音節殊覺爽亮

得方職方書

故人羈長安悵望何時遇錦字烏銜來金臺夢飛去風高碣石館月白津門渡置書懷袖間三復披情慄

夷門懷古

朝登大梁城。暮山夷門道。四野起淒風。令人愴懷抱。汴水東流西日傾。魏家宮殿夕煙平。殘碑剝落古苔字。行人猶識侯生名。已矣侯生及朱亥。鼓刀意氣今安在。松楸荒塚狐兔穿。禾黍空原市朝改。陳迹荒涼起暮哀。信陵旌蓋俱塵埃。山色不知公子去。柝聲猶似抱關來。倚劍行行發長嘯。世代興亡那可料。節俠豪華奚重論。月光還向夷門照。夷門道。動悲歌。古人慷慨今如何。夜深繫馬垂楊下。無奈霜天白雁多。

南安春日思歸

嘉峪漢封尾。河州天盡頭。山通去國路。雲礙望鄉樓。雄劍衝星起。悲笳落日愁。羈心與奔浪。夜夜向東流。

崆峒山

曾按圖經戴斗匡。廣成宮殿自軒皇。襄城七聖迷來往。少室三花入混茫。丹鼎依稀仙犬護。蒼山縹緲紫鸞翔。我來問道千年後。雲鎖高臺迹半荒。

徐桂一首

桂字茂吳。長洲人。居餘杭。萬歷丁丑進士。除袁州推官。有大滌山人集。

列朝詩集。茂吳爲袁州推官。恃才自放。坐計吏斥免。四明屠長卿。秀水馮開之。與茂吳同榜。皆失官家居。扁舟白袷。往來吳越間。長卿負才敏捷。叉手擊鉢。時人皆遜避之。獨茂吳與之抗行。尤多詠物豔體之詩。留連唱酬。至數十百篇。

飛絮篇

江城三月豔陽時。楊花如絮飛參差。悠悠宛轉知誰繫。歷亂輕盈不自持。可憐朝散銅池裏。可憐暮落章臺市。閒逐遊絲去復來。細縈花片低復起。灞橋繫馬及芳辰。白門藏鳥過上春。吹入粧樓全誤粉。飄將舞席半成塵。乍高隨鳥沒遙空。漸卑趁燕遶簾櫳。花飛猗靡如迴雪。質輕流便不因風。因風迴雪何綽約。偏從芳甸穿香閣。東舍王昌暫寄蹤。西鄰宋玉聊棲託。跡方蕩子少甯居。命憐賤妾多輕薄。其奈蕭疎欲盡春。已覺繁華不如昨。條風布煖水流澌。池邊林畔始垂絲。小小葉間分翠黛。盈盈樹下鬪腰肢。而今棄擲將何道。而今轉薄同秋槁。攀條倚樹重留連。行樂韶年苦不早。淒淒草徑總鋪氈。茫茫榆塞詎成綿。且辭芳樹猶依榭。夕化浮萍已逝川。子規聲裏千花歇。搖蕩春光劇可憐。

楊起元一首

起元字貞復。歸善人。萬歷丁丑進士。改庶吉士。授編修。歷修撰。司業。洗馬。乞歸。起祭酒。未任。擢南禮部侍郎。就改吏部。天啓初。追諡文懿。有文懿集十二卷。續刻家藏集八卷。

擬陶徵君飲酒

仲淹生隋世。麟出非其時。上策不見收。由然與世辭。講學河汾間。斯文其在茲。知命故不憂。盡性吾無疑。大哉中說書。周公豈我欺。詆譏傷予心。願從子所之。

趙崇善一首



崇善字伯堅蘭谿人萬歷丁丑進士除婺源知縣擢御史歷太常少卿

善六湛上人還括蒼

名僧有湛公來自括蒼東。趺坐揮塵談淨理。天花亂落天池中。今朝復往括蒼去。山鳥山雲留不住。送君  
灤江江水清。好山兩岸片帆輕。何時再過棲真地。中夜虛堂對月明。

張文耀一首

文耀字芝陽沅陵人萬歷丁丑進士除銅梁知縣改巴縣徵授御史出爲雲南副使歷四川參政  
就遷布政使有二酉洞草

夏日同客集北郊崇興禪閣

青山曲曲抱孤城。山外晴嵐倚檻生。別後風塵堪一笑。重來邱壑倍多情。天連遠水浮雲盡。寺擁長林落  
照明。我自十年稱吏隱。對君何惜放歌聲。

朱維京二首

維京字可大萬安人尙書衡子萬歷丁丑進士除崇德知縣遷大理寺評事歷汝州判官進光祿  
寺丞有訥齋集

詩藪可大詩高華雄邁

度飛虹橋

天影遙涵一水長。清波深處石爲梁。平銷碧甃連馳道。倒瀉銀河入苑牆。晴綠乍添垂柳色。春流時泛落花香。微茫迴隔蓬萊島。不放飛塵到建章。

圓通寺對月

萬丈芙蓉接玉樓。孤峯遙挾兩湖流。漢王坡上青天月。時見仙人控鶴遊。

沈九疇一首

九疇字箕仲。鄞人。萬歷丁丑進士。授刑部主事。歷郎中。出爲江西副使。遷四川參政。改江西。山東。累遷江西布政使。有曲轅居集。

田按箕仲詩是豐對樓一派。嘗與孫月峯輯今文選。月峯任文。箕仲任詩。其論龔洲詩。苦無完璧。未免螳臂當車之譏。

探丸

早時走馬夜探丸。新血模糊著錦鞍。背地殺人酬郭解。當場說劍笑燕丹。

傅光宅七首

光宅字伯俊。聊城人。萬歷丁丑進士。歷監察御史。工部郎中。出爲重慶知府。改遵義。再遷四川副使。

謝在杭小草齋集。伯俊詩。出於性情。而不出於豪舉。求之醞釀。而不求之纖穠。

田按。播州改土歸流後。伯俊知遵義府。安輯流亡。厥功爲多。五言蘊藉。取法唐人。

### 舟中待友人

煙樹淡微月。水風生夜涼。扁舟垂楊岸。葭菼何蒼蒼。尊酒欲斟酌。孤琴待清張。佇立望美人。露下沾衣裳。

### 發湘陰

春曉發湘陰。山行思轉深。花含昨日雨。鳥作故鄉音。樵子下松徑。田家依竹林。平生愛隱逸。白首違初心。

### 留別狄明叔汝陽別業

來此便難去。況茲遠別離。晴雲落曲檻。春鳥鳴深枝。暫醉月明夜。相思花好時。誰能當晚歲。千里負心期。

### 春日花下有感

江月江煙望白門。春風春雨自黃昏。年年楊柳無消息。夜夜梨花有夢魂。蘇小香車松下路。莫愁芳樹水邊村。緘情欲寄雙飛燕。腸斷迴文是淚痕。

### 吳門別屠長卿

扁舟歸自越江濱。客路逢君酒一尊。白雪歌成堪墮淚。青山何處不銷魂。城邊宿莽生寒燒。沙上殘潮落凍痕。無那風塵牽別思。依依還向醉中論。

宿湯泉公館卻憶江南

高館臨空山。山空深幾許。時聞泉上聲。誤作江南雨。

感舊

花下門仍在。尊前歌已休。惟餘舊時月。還上水邊樓。

陳泰來一首

泰來字伯符。平湖人。萬歷丁丑進士。除順天府學教授。遷國子博士。改禮部主事。進員外。謫饒平典史。泰昌卽阼。贈光祿少卿。有員嶠集。

靜志居詩話。員嶠年十八舉于鄉。十九釋褐歸娶。賜內府金花燈籠。知平湖事。劉抑亭贈以對聯云。秋進士聯春進士。大登科後小登科。鄉里榮之。公以氣節自許。居太學。忤江陵。因三王並封。面質太倉於朝房。又疏請建儲。既因計典。救孫鑑。謫饒平典史。陛辭就道。賦詩有直道不緣三黜改。孤忠或受九重知。卒年三十有六耳。謫歸日。夢至一山。羣仙咸集。賦詩云。涼風拂拂白雲收。宦海年年幾日休。翦紙作驢輕撥刺。桃花洞口笑淹留。相與樂甚。旁一仙云。汝乾浚子也。後一年當再會於此。覺而以乾浚子自號。踰年而沒。

塞曲

黃雲四合角聲哀。撥甲先登烽火臺。十道控弦齊落馬。幕中賓客上功來。

沈自邠一首

自邠字茂仁。秀水人。萬歷丁丑進士。改庶吉士。授檢討。進修撰。有修撰集。  
本覺寺三過堂

遵塗出枉渚。弭棹攀叢林。石幢委陳莽。殿壁生幽陰。昔賢此流憩。登堂復沈吟。往代蹟如埽。名留感彌深。  
悠悠東逝波。閱世成古今。前賢既已爾。何用役吾心。

張敬一首

敬字爾和。淄川人。萬歷丁丑進士。除中書舍人。遷禮部主事。有儀部集。

靜志居詩話。爾和不以詩名。聲律未能悉諧。然頗有生趣。如曇花侵斷壁。木葉響空廊。鷺下啄寒葦。猿垂聽古藤。故人滄海隔。歸夢白雲深。亦自流暢。

寄懷李子亮昔同別業三峯

背郭草堂靜。溪邊生事幽。松聲響靈籟。人語亂寒流。貧病惟書帙。滄浪此釣鉤。鄰翁勞慰問。把酒話綢繆。

陸可教二首

可教字敬承。蘭谿人。萬歷丁丑進士。改庶吉士。授編修。累遷南禮部侍郎。贈尙書。有葵日集。

金華詩錄。葵日詩。秀色清韻。娟娟自好。

桃花峪

行行指青冥。路入桃花峪。夕陽寫山影。蒼翠如可掬。初聞流水駛。漸見澄潭綠。苔髮淨可梳。石子明如玉。

百尺清見底。澄泓瑩心目。隔林聞犬吠。擬就桃源宿。

湖上

攜筇出深竹。湖光已皎皎。四望煙霧開。空明盪清曉。千峯雲外高。孤嶼望中小。園林旣蒼鬱。樓觀亦縹緲。湖光本無受。物象何了了。余心忽有會。頓絕名言表。

萬象春一首

象春字仁甫。無錫人。萬歷丁丑進士。選庶吉士。改工科給事中。遷禮科都給事中。出爲山東參政。歷山西布政使。以右副都御史巡撫山東。引疾歸。起南工部侍郎。未上卒。贈右都御史。

王羽士水樓

水閣夜無暑。談元心自閒。烹茶供野客。習靜閉柴關。花豔池中月。煙迷湖上山。本來忘世味。坐久不知還。

李玄齡一首

玄齡字仁卿。華陽人。萬歷丁丑進士。累官山西副使。

平陽城西樓

華霍高城外。平陽輦路存。山川燕北里。城關晉東門。尙想懷陵操。重觀擊壤村。漫嗟今古異。譙鼓閱朝昏。

甘雨一首

雨字子開。永新人。萬歷丁丑進士。選庶吉士。歷南兵部員外。禮部郎中。出爲廣西僉事。改貴州。遷福建副使。湖廣參政。有翠竹青蓮二集。

春日摩訶菴

淨土榜摩訶。羣公選勝過。春風聞佚蕩。佳日此婆娑。地僻疑韋杜。人今似永和。野花如有意。片片點藤蘿。

馮大受一首

大受字咸甫。松江華亭人。萬歷己卯舉人。除陽山知縣。有竹素園集。

弇州山人續稿咸甫詩和平。能酌於深淺濃淡之間。高不至浮。卑不至弱。

送徐光祿奉使還朝

玉册臨江右。星槎下帝京。桐珪周典禮。帶礪漢宗盟。內署才名重。中朝使節榮。觀風應有得。早晚達承明。





# 明詩紀事卷十三

## 庚籤

蕭良有二首

良有字以占。漢陽人。萬歷庚辰第二人及第。授編修。歷中允。遷國子祭酒。有玉堂遺稿。

大閱應制

國運千年泰。皇威九伐張。中春稽令典。吉日簡戎行。輦道雲霞繞。旌門日月光。前麾過細柳。後隊出長楊。遊騎諸陵俠。材官六郡良。金戈開霽色。寶劍動星芒。躍馬還超乘。穿楊獨擅場。無譁軍禮肅。有備廟謨長。會洛遵前古。誇胡恥後王。屈人還不戰。萬載奉明昌。

江行

江水悠悠江路長。孤鴻嘯月有微霜。十年蹤迹渾無定。莫更逢人問故鄉。

願憲成一首

憲成字叔時。無錫人。萬歷庚辰進士。除戶部主事。改吏部。謫桂陽州判官。遷處州推官。改泉州。擢吏部主事。歷員外郎。中以忤帝意。削籍歸。起南光祿少卿。不就。天啓初。贈太常卿。以闖黨追論削。

奪崇禎初贈吏部侍郎諡端文有涇皋藏稿二十卷

田按端文與高忠憲講學東林海內推爲山斗公嘗自言官輦轂志不在君父官封疆志不在民生居水邊林下志不在世道君子無取焉與淮撫李三才交善三才爲忌者所論公居林下賒書業福清孫太宰爲延譽時以出位責之三才有雄略公之延譽自爲世道計厥後論三才者多附闖黨麗名逆案一薰一蕕始有定論云

送虹賓

不盡臨歧意依依立馬看一經登第早三尺事人難月到河陽滿天連函谷寬之官有嘉譽倏爾遍長安

鍾羽正二首

羽正字淑濂益都人萬歷庚辰進士除滑縣知縣徵授禮科給事中改工科遷吏科都給事中以言事斥爲民光宗卽祚起太僕少卿進本寺卿歷右僉都御史左副都御史遷戶部侍郎拜工部尙書贈太子太保有崇雅堂集十五卷

四庫總目羽正清介耿直爲時所重故集中奏疏多切中時弊詩多感激時事之作氣體尙道

註籍京邸

長夏何攸鬱閒門自掩扃雲來小閣暝雨歇遠山青謝客緣多病憂時愧獨醒匣琴還自理苦調若爲聽

南行

南經沂沐道極目總荒榛疲馬緣山徑孤鴻下水濱石田千里瘠茅屋數家貧野叟時相語年饑一愴神

陳尙象一首

尙象字心易。都勻衛人。萬歷庚辰進士。授中書舍人。遷戶科給事中。改刑科。吏科。以請元子豫教。斥爲民。天啓初。贈光祿少卿。有集。

田按。心易僭李獻可等疏。請元子豫教。帝怒。獻可貶秩調外。心易等奪俸半歲。心易復抗疏爭。帝益怒。斥爲民。鄒忠介之謫戍都勻也。心易及門請業。爲名弟子。心易卒。忠介誌其墓。序其疏草。人謂不愧師門云。

便河詩并序

雲故有便河。實始於正德間。兵憲李公麟。歲久迹湮。鞠爲蔬圃。今憲使袁公甫下車。譚及便河。慨然曰。茲綢繆之至計也。可廢不舉乎。捐俸斥鍰。計徒採石。自小河口築長隄若干丈。引水灌於故道。歷兩西門而南。與東山左掖諸水會流。以達於龍潭。民不告勞瘁。工不易歲時。而長河如練。與金城相表裏。真可謂賢勝兵十萬矣。余聞父老言。建城之初。高皇命有司繪圖以進。恐諸苗憑高俯窺。遂以御筆指點於東山之巔。嗣是雖間有憑陵。絕無敢從東門入者。獨西北地形稍下。故遠如正統之變。圍城至十閱月。近如壬癸之際。軍民士大夫咸不得帖枕席。茲河所係。良非尠矣。雲僻在一隅。無他擾。獨其害在苗耳。公修永賴之利。於百年廢壞之餘。功德吾雲者。詎有涯哉。余烏得無紀。乃爲詩曰。

高城蕩蕩跨於東山。高廟所經。旣雄旣堅。西北迤邐。漫無坡陀。以帶以礪。實爲便河。上醜江流。達於龍潭。金隄屹屹。而北而南。便河未開。士不帖枕。便河旣開。賊至安寢。維袁憲使。紹蹟李公。徹彼舊湮。以護崇墉。役不瘁民。成不易歲。我爲銘詩。以詔後世。

章嘉楨一首

嘉楨字元禮。德清人。萬歷庚辰進士。除當塗知縣。累官大理寺丞。有姑孰集。南征集。中林草。

姚旅露書章元禮送余餘不溪上作詩贈別中有白鷺一行曉青山相向春句初是曉鷺一行白春山相向青一倒便覺老練有趣。

秋日田家樂

東園瓜比舊年稀。西沚菰饒今歲肥。桑葉未枯楓葉赤。入城先買木棉歸。

龍膺五首

膺字君善。一字君御。武陵人。萬歷庚辰進士。除徽州推官。謫温州教授。歷國子博士。遷禮部主事。復謫兩淮鹽運判官。遷鞏昌通判。歷同知。遷南戶部員外。歷郎中。出爲山西僉事。歷陝西參政。拜南太常卿。有九芝集。選十二卷。

太函集君御詩鍛鍊精嚴。

楚風補太常清廉放達才名冠一時。

田按君御官徽州時入汪司馬饒中社由司馬以交王元美元美贈詩云不嫌詩社累仍傍酒人過蓋君御是時以詩酒挂吏議也晚與袁中郎善其詩不與袁近才氣橫溢長篇不免拉雜頗近屠緯真一派

### 登南山過李白訪許仙故址

策杖南山巔天風吹我襟巖穴結茅屋落木悲蕭森上有丹液池纖鱗時浮沈云是許仙居好道隱嶽岑供奉探靈異擔笈眷幽尋振袖拂赤霞攀柯矚碧潯俛仰山水間悠悠良賞音陵谷已代變先民予所欽詎能且暮遇爲我豁蓬心

### 宿廢邑端氏古刹偶書

役役疲遠征白日沙礫晦石樓鬱嶮岬沁流浩奔匯遺墟問晉封荒郭溯漢代名猶端氏存邑已先朝廢依稀聞絃歌颯沓聆梵籟寶相瞻摩尼法座湮蓬塊方丈閉儲胥山僧習耕耒古德有慈明宗門著風概曾遊澤潞間竄名渾火隊露宿造汾陽卒嗣昭公派往來楊李間宋楊大年李都尉把手遊方外西河獅子兒須彌納纖芥元風邈不揚安復望若輩俯仰千古人誰能契無礙那得慈明流與之談三昧

### 燈夕後晉邸以詩見懷次元韻應教

珪錫唐封地書傳晉世家淮王招桂樹楚客頌椒花寶翰標黃絹珠函擁絳紗向來勞設醴密坐瀉流霞得袁中郎小修洛下書并出塞詩用韻和答

雙袖朝飛石浦雲。蘭林芳閣思氤氳。迎來一水桃根楫。注就三車貝葉文。齋謝太常終佞佛。略輸充國老從軍。雅歌濁酒渾無事。朗月澄江獨憶君。

寄楊修齡侍御按黔中

關河秋色片鴻翔。萬里音塵問渭陽。繡斧遠馳天子使。檄書先斬夜郎王。豪箋雙絕成遊獻。俎豆三賢借表章。寄語花谿耆舊社。一尊煙月待漁航。  
修齡爲先祖太渠公及蔣道林文橋菴兩先生建三賢祠於黔中以三賢皆黔省名宦又皆吾里人也

史旌賢一首

旌賢字廷徵。大理雲南縣人。萬歷庚辰進士。除內江知縣。徵授御史。累官副史。

偶成

吳門市卒安在。楚狂先生何之。閉關厭聞新論。中酒且刪舊詩。

黃克纘一首

克纘字紹夫。晉江人。萬歷庚辰進士。除壽州知州。入爲刑部員外郎。累遷山東布政使。以右副都御史巡撫山東。累功加兵部尚書。參贊南京機務。召理京營戎政。改刑部。加太子太保。復改兵部。加太子太傅。移疾歸。起工部尚書。加太子太師。乞歸。起南吏部尚書。不就。有乘槎稿。

用按尚書立朝好持異議。與清流爲難。故三朝要典極詳之。雖晚以忤闕去。不能蓋前愆也。

黃田驛次胡二溪先生韻

古驛清溪上。空階草色侵。愁聞寒雨滴。坐久白雲深。短缺中原志。清尊五岳心。酬知懷國士。搔首愧華簪。

許弘綱一首

弘綱字張之。東陽人。萬歷庚辰進士。除績溪知縣。改金壇。入爲給事中。轉兵科都給事中。歷左通政。順天府尹。累遷南兵部尚書。贈太子少保。有羣玉山房集。

山房卽事

天私一壑老臣閒。溪上柴門白晝關。僧磬有時來竹裏。酒船無日不花間。開籠夜放林公鶴。拄笏朝看謝朓山。澤畔主恩原不淺。行吟何事損朱顏。

柳希點一首

希點字汝志。蘭谿人。萬歷庚辰進士。除贛州推官。入爲工部主事。歷郎中。出爲松江知府。改南雄。遷徽甯副使。有桃源里草。

方正學先生以忠孝流芳題額追贈先祖瞻仰生哀感而有作

先生秉忠孝。厄會丁其時。慟哭對新朝。臣志日星垂。一死不求名。寂寞葬江湄。大書補史闕。生氣猶淋漓。  
先祖諱敘。景定甲子。由胄監以賢良方正。仕蘭谿尉。因家於蘭谿之城西。祥興已卯。宋亡。大慟絕粒五日而卒。遺命藪葬中野。不封不樹。吳正傳爲作墓誌。

鄒觀光一首

觀光字孚如。雲夢人。萬歷庚辰進士。除吏部主事。乞歸。起南兵部郎中。擢太僕少卿。有孚如集。

蒼霞草。字如古詩深沈。近體流麗。

卜居東隅

倦仍投筆去。閒卽載書來。已近黃花節。能無竹葉杯。江山千古色。詞賦一時才。試望晴絲捲。浮陰爲我開。

石崑玉一首

崑玉字汝重。黃梅人。萬歷庚辰進士。除戶部主事。歷郎中。出爲饒州知府。改蘇州。紹興。遷山東副使。歷福建參政。以右僉都御史巡撫大同。有齡山堂。蘇州。石居士等集。

悼亡

自結絲蘿日。遂成連理枝。一生貧病侶。半世影形隨。落葉敲窗夜。殘燈倦枕時。不知人去遠。猶作在堂疑。

余寅一首

寅字君房。一字僧杲。鄞人。萬歷庚辰進士。除工部主事。遷禮部員外。歷郎中。出爲陝西副使。遷山東參政。入爲太常少卿。有農丈人集二十八卷。

甬上耆舊集。農丈人詩。瀟而堅。質而峭。介然之色。絕似其人。



雨後灘行

雲帆未可賒。雨外更天涯。日日繇蠻鳥。山山躡躑花。松根輕蝶子。溪水野人家。見說灘頭濁。朝來幾尺沙。

邢雲路四首

雲路字士登。安肅人。萬歷庚辰進士。除繁峙知縣。改汲縣。再改臨汾。徵授兵部主事。歷員外。出爲河南僉事。歷參議。副使。按察使。有澤宇先生集十卷。

過故關懷友

行矣日云暮。馳驅過故關。鄉心隨落雁。客淚墮寒山。世態黃金盡。交情白首難。有懷卻遠道。愁絕水潺湲。

井涇過王廣文

天涯逢故友。相對轉淒然。薄宦同爲客。浮生各問年。琴尊開絳帳。詩句冷青氈。去住憐今夕。燒燈又別筵。

悲秋

青山堪伏枕。羈客亦悲秋。何處孤鴻唳。銷魂明月樓。

贈歌者賈遷

一曲高歌酒一卮。聲聲哀咽竹枝詞。登高送遠欲歸去。滿眼雲山好贈誰。

楊子庭一首

于庭字道行。全椒人。萬曆庚辰進士。除濮州知州。徵授戶部員外。遷兵部郎中。有楊道行集十七卷。

四庫總目。道行五言古詩。時露清挺。

對月懷余宗漢

愁緒亂如絲。思君對月時。自知無住著。不復怨睽離。魄落仍呼酒。神來但賦詩。八壺山色好。頭白是歸期。

臧懋循一首

懋循字晉叔。長興人。萬曆庚辰進士。官南國子博士。有負苞堂詩選九卷。

四庫總目。懋循詩多綺羅脂粉語。

列朝詩集。晉叔風流放誕。官國子博士。每出必以棋局蹴毬。繫於車後。又與所歡小史。衣紅衣。並馬出鳳臺門中。白簡罷官。時南海唐伯元上書議文廟從祀。恭進石經太學。與晉叔偕。同日出關。湯若士詩云。卻笑唐生同日。一時臧穀竟何云。藝林至今以爲笑談。

靜志居詩話。晉叔精曲律。持論斷斷不爽。詩亦不墮七子之習。故雖從元美讖遊。不入四十子之目。亦磊落之士也。田按。晉叔官南都時。入曹石倉詩社。詩雖綺靡。亦有清致。

集沈氏水亭餞送曹能始北上

相送江亭暮。尊空客漸稀。楊花不解別。到處逐君飛。

林廷陞一首

廷陞字彥賓莆田人萬歷庚辰進士累官廣西副使

送黃全之遊粵

迢遞南州地掉頭賦遠遊。溟南長欲雨海國易生秋。樹遠浮空出江寒背郭流。異鄉殊節候慎勿久淹留。

車大任一首

大任字子仁邵陽人萬歷庚辰進士除南豐知縣謫平谷尉遷遵化知縣入爲南評事歷禮部郎中出爲福州知府改嘉興遷浙江副使進參政有囊螢閣正續集四十卷

靜志居詩話子仁詩頗閒放無局促態

沅湘書齋集邵陽車氏以文學世其家幾於人人有集皆自子仁發之

過秋田訪胡先生墓

行行邵陵西秋田君故里墓碣久淒涼花竹空如綺懷古亦何心踟躕獨不已詩魂千載存云我誰何氏

同宋明麓甘昆原曹南麓唐元宇高吉軒登雙清亭

白蘋涼露楚江東臨水看山中鳥同雙棹正逢溪水合百錢何惜杖頭空秋生花樹葳蕤後人在樓臺掩  
霧中明日分攜南北去不知何處聽征鴻

王庭謨一首

庭謨字敬卿華州人萬歷庚辰進士選庶吉士授編修遷修撰有松門彙八卷

馮琦宗伯集敬卿詩有沈鷺邁往之氣

恭侍經筵有述

鳳輦初迴仙路平。虎闌朝啓曙華生。瑤編風度芸香細。黼座煙浮玉几橫。繚繞星文環北極。殷勤天語下西清。愚臣經術慚無補。何幸年年侍聖明。

張萱二首

萱字孟奇博羅人萬歷壬午舉人授殿閣中書歷戶部郎中有西園存稿。

畫史會要孟奇雖不以繪事名家偶一爲之頗饒別趣

靜志居詩話孟奇熟於典故周見洽聞著書頗多其在西清重編文淵閣書目具載卷帙補前人之闕漏惜乎香廚所存已失其什九矣

弩臺

遺鏃間耕叟登臺傷客心。初煙扶岸上片雨隔溪深。往事隨芳草。秋風生遠林。南朝一溝水。嗚咽到如今。

九日平原舟中

秋色日云暮。客行猶未休。微霜渡遠水。寒雨逗歸舟。九日殊方節。千山落木愁。不知三逕菊。開徧幾叢秋。

何三畏一首

三畏字士抑松江華亭人萬歷壬午舉人授紹興推官有漱六齋集四十八卷。

送康季修南遊

任俠康公子。丰標衛叔流。才名高入洛。詞賦重登樓。結客千金散。探奇五嶽遊。長干多北里。風月莫淹留。



# 明詩紀事卷十四

## 庚籤

朱國祚一首

國祚字兆隆。秀水人。萬歷癸未第一人及第。授修撰。歷洗馬。諭德。庶子。擢禮部侍郎。改吏部。引疾歸。起南禮部尚書。召入東閣。參預機務。加太子太保。進文淵閣大學士。改戶部。進武英殿大學士。加少傅。贈太傅。諡文恪。有介石扇齋二十卷。

朱彝尊明詩綜。曹潔躬云。文恪詩婉秀。軒軒霞舉。一無俗塵。朱朗詣云。文恪詩如冰荷在壑。冷香襲人。俞右吉云。太傅詩。自抒性情。不事沿襲。諸體俱合。不失正始之音。

田按。文恪詩清挺。介石齋集不傳。賴文孫彝尊輯詩綜所錄甚夥。猶得觀其大略。

## 摩訶菴觀杏花作

摩訶菴外袖吟鞭。繁杏春開十里田。曾與村翁舊相識。看花不費酒家錢。

明詩綜。吳巨平云。元時。杏花。齊化門外最繁。東岳廟石臺。羣公賦詩。張謙傳爲盛事。葛籛易之詩云。上東門外杏花开。千樹紅雲遶石臺。最憶奎章虞閣老。白頭騎馬看花來。至明。城東花事衰。郊西漸盛。萬歷後。摩訶菴杏花多。至千株。吾鄉朱太傅養淳

詩云承平之日輸死風流後先一致也。

李廷機一首

廷機字爾張晉江人萬歷癸未第二人及第授編修累遷祭酒進南吏部侍郎改北遷吏部尙書兼東閣大學士參預機務加太子太保贈少保諡文節有集十八卷

頒歷恭紀

當陽瞻聖主布朔御明堂帝德三台耀皇風八表翔葭灰隨律動莫莢應時昌歷協軒轅紀恩頒鴛鷺行紫函浮瑞彩黃道燭榮光共道璿璣正還看寶籙長

劉應秋一首

應秋字士和吉水人萬歷癸未第三人及第授編修遷南國子司業召爲中允歷洗馬諭德庶子遷國子祭酒贈禮部侍郎諡文節有司成集

存真集司成劉公詩文雍雍舒徐出入韓歐間

題張洪陽閒雲館

心遠喧常靜身閒道自夷因兼大小隱閒誦去來詞書案風開帙花闌雨濯枝浮雲同此意行住本無期

葉向高五首



向高字進卿。福清人。萬歷癸未進士。選庶吉士。授編修。遷南國子司業。就遷中允。歷諭德庶子。充皇長子侍班官。擢南禮部侍郎。就改吏部。召拜禮部尙書。兼東閣大學士。加太子太保。進文淵閣大學士。加少保。改戶部。進武英殿大學士。加少傅。兼太子太傅。改吏部。進建極殿大學士。加少師。兼太子太師。崇禎初。贈太師。諡文忠。有蒼霞草、續草、餘草二十卷。紀遊小草八卷。

姚希孟松癭集。李長沙相業。人多疵之。乃其處事圓敏。又有憐才之心。於逆瑾時。多保全善類。近日福清公頗近之。福清詩文。亦庶幾步武長沙。但長沙能推誠以就模範。而福清多出之率易。則後先人之不相及也。

列朝詩集。公爲人。疏通明敏。小心恭順。受神廟特眷。當宮府睽隔。黨論紛叟之日。以調停劑和爲能事。應機圓而見事捷。不動聲色。使人主信而從之。再起則椽人爲政。羣小關通。能以智免。善其進退。公去而國事益不可爲矣。公與江夏郭美命同館。以文章互相推許。皆有集行世。公詩文信筆輪寫。長於獻酬流俗。而美命酒莽自運。敢於評量古人。截長補短。則亦魯衛之政也。靜志居詩話。東林諸子。奉福清爲倫魁。沙汰江河。和調水火。海內服其公忠。歸田之日。蘊藉風流。銜左相之筐尊。賭東山之棋墅。詩品在山林臺閣之間。諸體皆具。

東南嶠外詩話。文忠有次許中丞澄瀾閣覽勝韻云。澄瀾高閣枉嚴旌。爲愛波光四面平。桑柘幾家湖上社。芙蓉十里水邊城。龍臺煙鎖餘荒壘。鯨海秋高罷戍兵。尊俎折衝多賸暇。登樓又見賦先成。近黃莘田先生取此詩三四句書爲楹帖。懸之開化寺。宛在堂前。十四字遂膾炙人口。

田按。萬歷中葉以後。主荒於上。政淆於下。雖有善者。無如之何。文忠委曲效忠。力窮補救。時有舉江陵勳績爲當時對症藥者。文忠曰。令江陵在。凜凜救過不暇。何勳績之有。然萬歷末年。樞輔實無江陵才。不得以此謝責。及再入閣。關人專柄。得免於禍。斯爲智矣。文忠詩和雅有節。可與東阿子文定抗行。

題方正學先生祠堂

燕歌一夜滿都城。大內罨恩火徹明。無復看書延侍講。仍傳天語勞先生。兩朝事往君恩在。十族煙銷詔草成。爲問精靈何處是。雨花臺畔子規聲。

歌風臺

泗水亭邊御輦過。只今人說漢山河。風雲自護興王地。父老爭傳擊筑歌。酒散夕陽宮樹冷。臺臨春岸野花多。最憐楚舞情愁絕。遺恨千秋尙不磨。

林宗伯見示春曹卽事依韻奉答

綸扉重入幾星霜。此地相傳有病坊。唐人以秘書監爲宰相病坊。又宋人中使頻來催擬旨。門官隨到報升堂。虛言政事歸三府。但見文書列兩房。內閣有制敕。詔敕兩房。晝漏已沈初下直。看移日影下宮牆。

莫愁湖

十里平湖帶畫橋。當年歌舞惜妖嬌。空餘菱鏡明秋水。無復蘭舟盪晚潮。隔岸遠山分翠黛。繞隄垂柳學纖腰。風流未覺穠華歇。一望煙波醉不消。

得請述懷

乍遠清禁不勝情。老去依依戀聖明。橐侈黃金重拜賜。身歸白社再尋盟。休官妻子頻頻勸。入里兒童款

款迎。此日都城供帳在。相看已少舊公卿。

于若瀛十四首

若瀛字文若。濟甯衛人。萬歷癸未進士。除兵部主事。歷郎中。出爲河南僉事。歷南尚寶少卿。就遷  
通政參議。召拜太僕少卿。以右僉都御史巡撫陝西。贈右副都御史。諡襄敏。有弗告堂集二十六  
卷。

焦贛澹園集。念東詩。不激而高。不刻而工。雋永藏於溫醇。纖穠寓之雅澹。

靜志居詩話。念東詩格未超。然不肯作輒熟語。

田按。文若詩不入當時流派。矯健之篇。妙得古人氣格。

燕市遨遊追憶宋鵝池

結宇託窮嵐。腰鎌入都城。未聞巢與由。買山始逃名。才傑捐時尚。翫世而達生。門環七貴轍。盤厭五侯鯖。  
傲睨橫今古。懶散廢逢迎。浪迹雖易見。誰尋理相形。

青溪

自昔奢行樂。今人亦解遊。三山開麗壤。六代擅風流。滔滔一灣水。銷盡古今愁。

秋日登清涼臺

市遠曠佛宇。霜林絢如繡。孤阜憑風迴。突出香臺後。危亭冒其頂。面勢巧爲構。巖嶮鍾岫近。睥睨江光透。雄壓白門麗。峻掩金川秀。落木響空檐。飄嵐潤衣袖。薄暮未肯下。遠燈亂出宿。

馬對

冬曦澹廣野。沙飛昧崇岡。匹馬循荒谿。冰結川無梁。落日阻三河。野老僵路傍。問之繫何人。皺面髮且黃。云是牧馬者。十室九逃亡。我茲不及壯。頽然不我將。君從檀州來。不見五馬房。房中日鳴鐘。一笑傾千觴。渠馬障錦綸。而我囊無糧。災沴苦頻仍。蔽天來飛蝗。假云鳳凰食。詎止瓜瓠傷。一日不再饋。芻秣安所望。語旣動長悲。涕下霑衣裳。遼將新出關。選騎赴沙場。疇知養馬家。頽垣秋草長。何日罷防邊。歸馬華山陽。

宿靈巖寺

地以僧寮勝。門兼客騎稀。孤燈搖畫壁。叢篠發清機。谷靜鈴風逗。林寒法雨飛。夜深攬衣坐。轉覺欲飯依。

過法藏寺尋愚上人同詣摩訶菴聽無絃彈琴

斜照下疏林。禪關此日尋。雲來生黯淡。僧轉入幽深。竹屋出新茗。石床響古琴。戛然高韻在。暝樹起層陰。

再過清涼寺

再入清涼寺。高臺覽舊都。金陵猶王氣。石壁自雄圖。密樹依城合。澄江入雨無。六朝人事改。瞻眺獨踟蹰。

夏日村居

雜樹土能秀。平疇夏不炎。微風時薄砌。返照故燠簾。草地鋪常坐。瓦杯乾自添。倦來索枕臥。斜月挂纖纖。  
發靈寶縣

弘水西來曲抱城。新秋雨色望偏清。馬頭青嶂千尋起。樹裏黃河一片明。入部星光催漢使。近關人語半秦聲。岧巖二華知何處。遙見氤氳紫氣生。

宿龍興寺

龍興寺古轍迹稀。寺前見山山雲飛。獨槐裊裊蔭門靜。亂水潺潺觸石微。入室僧定寂清磬。盤空鶴來巢夕暉。坐深煙歇萬山暝。松火幾家開竹扉。

蹇理菴老師再起薊遼總督志喜

上相行邊節鎮雄。長城遙控帝城東。旌旗曉下三巴水。驢馬驚嘶五國風。偏將帳前閒射虎。鯁生門下愧雕蟲。么麼每欲酬知己。白首籌邊苦未工。

長安冬夜詞

自昔岧嶮上京朝。朝車馬縱橫。千山夢越鄉國。一枕寒生客情。樓外塞鴻悲切。窗前叢篠淒清。沈吟永夜不寐。濁酒無人自傾。

金陵春絕句

秦准柳色弱於絲。十里煙花澹蕩時。明月一灣開水閣。何人吹徹玉參差。

華嚴寺

逢僧宛宛著袈裟。小閣焚香日易斜。寺遠不知春已暮。滿山開遍石楠花。

郭正域一首

正域字美命。江夏人。萬歷癸未進士。改庶吉士。授編修。歷中允。諭德。庶子。遷南國子祭酒。入爲詹事。掌翰林院事。遷禮部侍郎。諡文毅。有黃離草十卷。

靜志居詩話。文毅論樂府云。今人全用擬議而無變化。令人讀之。如挾陳人口中珠。殆爲子鱗輩發也。又言文章不可學一家。詩必自三百篇。漢魏六朝下至唐人。皆在胸中筆底。乃稱作家。蓋有志而未造其詣者。

黃鶴樓

樓閣重重上女牆。昔人曾此醉爲鄉。煙橫巫峽千山遠。雨過瀟湘一水長。依舊空中雲盡白。不聞市上鶴曾黃。從教玉笛頻吹徹。只恐神仙亦渺茫。

殷都一首

都字無美。蘇州嘉定人。萬歷癸未進士。除夷陵知州。入爲兵部員外。歷郎中。改南刑部。有爾雅齋集。

唐時升三易集。無美詩。務爲剗削。自成機格。譬之沃釜而炊。不因人熱。

田按。無美列元美四十子之一。無美晚達。元美詩所謂跌宕詞翰。林燁燁吐色絲。異時平津拜。不言公車遲也。官職方郎。爲石司馬星所阨。改南刑部。旋罷官。詩有豪氣。惜集不傳。余從岳陽彙勝集獲詩一篇。亟登之。

### 登岳陽樓望洞庭君山歌

我聞洞庭八百里。日月出沒在其裏。登高欲覽值晦冥。俯視一氣如太始。何處來罡風。吹雲清若空。忽驅君山色。盡落吾杯中。舉頭望湖波。乃覺宇宙真無窮。九江孔殷惟禹功。不知巨靈剖判誰爲工。近者據城城欲動。遠者黏天天欲通。轉輸銀河潤下土。摩盪石鏡窺高穹。九州一州大澤一澤。何況大瀛焉知其極。我欲因之排闥出。飛上君山瞰空碧。宿火猶疑軒鼎溫。餘音未必湘絃寂。不然酒香應滿山。耐何惟令此兒食。黃鶴呼不來。綵舟安在哉。一葦詎可杭。令我徒裴回。于嗟洵美非吾土。家有洞庭亦如楚。七十二峯點點浮。持比君山或堪伍。其下一穴通此湖。疇昔曾聞杰公語。但舐青泥餒不愁。若拾玄珠幽可睹。安得俯身試潺湲。靈威丈人導我還。未能便逐羣龍去。且自遨遊吳楚間。

### 梅國楨一首

國楨。字克生。麻城人。萬曆癸未進士。除固安知縣。徵授御史。擢太僕少卿。以右僉都御史巡撫大同。進兵部侍郎。總督宣大山西軍務。贈右都御史。

感懷

蒲俗不可問。吾將還舊廬。誰知肝膽在。但覺鬢毛疏。野老從爭席。王門莫曳裾。由來彈鋏意。不是歎無魚。

朱長春二首

長春字太復。烏程人。萬歷癸未進士。除尉城知縣。改常熟。陽信入爲刑部主事。削籍爲民。有太復文集。

靜志居詩話。太復頗類孫太初。其宰陽信。狀海濱風土。如海暗雲連舍。春寒雨近城。沙田惟種黍。鹵井不通泉。過雨如露雪。無風自落沙。白沙風裏下。黃日霧中生。薄祿供囊藥。齋廚費水錢。頗盡其致。他如折藕露華白。采菱秋水香。悠然西湖曲。坐對南屏山。高樹晨光動。空山衆響聞。麥花來社燕。小雨破春泥。落日餘高柳。空江起暮鐘。酒船晴盡出。賽鼓暝猶聞。纜外春沙沒。燈前獨樹斜。蒼藤綠戶結。翠鳥落階飛。驛火依沙出。春星傍浦懸。孤飛江上鳥。半減雨中山。皆秀句也。

歲事歌

除夜春雷隱地起。小年歲雪紛未已。黃泥乍融不肯凍。百草作芽青欲死。草死不愁愁麥黃。冬煖根薄恐易傷。眼前米市忽騰糶。人間那得陳千倉。城頭烏鵲無數叫。父老對之愁斷腸。

春晚歸雲菴留題

細草迷巖路。平田帶寺門。春風遊客少。宿鳥見人喧。山翠當虛坐。花紅落小軒。清幽愜所好。況對道林言。

趙世顯一首



世顯、字仁甫、閩人。萬歷癸未進士。除池州推官。有山居。闕下。入蜀諸集。

### 送林太學

離筵開野岸。芳草滿汀洲。把袂此中別。揮鞭何處遊。鶯嬌吳苑樹。花暗越江樓。莫謂春方好。相思易及秋。

### 虞淳熙一首

淳熙、字長孺、錢塘人。萬歷癸未進士。授兵部主事。遷吏部員外。有權務山館文集二十五卷。詩集八卷。

棗林雜俎。錢塘邵山人虎菴。善吟繪。讀書山中。有隱操。郡丞新建喻楓谷均欲見之。不得。怒奪其山。虞淳熙詩。老作閒民不負租。石濠石澗路應迂。叩門雙騎傳呼急。一片紅塵山已無。按楓谷擅聲藝苑。傾慕緇衣。而事同伐木。所以鑿坯踰垣之寥寥也。列朝詩集。長孺賦才奇譎。搜抉奇字僻句。務不經人。弋獲。以爲絕出。於時賢頗心折。湯若士。屠長卿。自詭以寡兀勝之。雖未免牛鬼蛇神之謂。可謂經奇者也。

田按。萬歷中葉以後。詩道歧出。長孺學仙學佛。既無升天之質。又無廣長之舌。二氏語言。一經運用。便成鈍根。斯又公安。竟陵所不爲者也。

### 傲游仙詩呈心渠上人

仙家誰掌白榆城。除目新看第一名。爲遣玉鸞三十二。銜書先報紫衣卿。

### 張壽朋四首

壽朋字冲蘇南城人萬歷癸未進士除刑部主事謫泰安同知遷廬州通判有深息窩集

田按冲蘇詩有遁脫之致

泗水亭

亭長未爲薄王侯安足多眼前秦吏卒身後漢山河苦畏韓彭在聊將父老歌達人一長嘯不醉欲如何

入山

從天分紫府有地似元都白髮餘生好紅塵一事無松筠何代種猿鶴聽人呼竟日長端坐冰心映玉壺

書門

多情纏葛藤一奮見鷗鷺緩頰人相賤低眉我不能無書干顯者有髮似高僧莫作寒蟬笑千秋劉季陵

自遣

人從山徑斷正喜草蕭蕭煙景春三月鐘聲寺六朝書多非佛老夢只到漁樵久矣無名姓還誰許見招

鄒德溥一首

德溥字汝光安福人祭酒守益孫萬歷癸未進士改庶吉士授編修歷中允遷洗馬有雪山草

句吟

九龍菴

杖到山窮處，忽開祇樹林。巖空松子落，磴古蘚痕深。野鶴有仙格，枯僧無世心。此中觀太始，靈籟夜沈沈。

徐學聚一首

學聚字敬輿，蘭溪人。萬歷癸未進士。除浮梁知縣，改吉水，擢禮科給事中，出爲湖廣僉事，歷山東副使、福建布政使，以右僉都御史巡撫福建。天啓初，贈副都御史。

靜志居詩話：弘正以前，實錄儲祕館，薦紳罕得寓目。此視希哲九朝野記、徐昌穀翦勝野聞等書，多齊東野人之語。自華亭在政府，鈔有副本，奔州見之，故史料始得其實。敬輿國朝典彙一編，亦從實錄采摭者也。詩亦尙聲格，惜所傳不多。

### 遊武夷溪山宿天遊觀

溇泓萬里流，峭突萬古壁。下有蛟人居，沈冥不可識。真宰欲獻奇，假我扶搖翼。紛來眩目光，獨往疲足力。仙蛻吐雙塔，佛螺觀千碧。三十六危峯，元英媚几席。把酒一酌之，相對若主客。俄焉迷晚徑，一壑聊與適。

### 柯茂行一首

茂行字堯叟，莆田人。主事維騏孫，萬歷癸未進士。除海陽知縣，有柯亭集。

### 夏日集胡氏園亭

茲晨愜幽期，茲亭頗宜暑。蘿陰漏白日，花檻落紅雨。藉草時偶談，看山或共佇。取醉渾忘歸，月出樓頭樹。

### 葛曦一首

曦、字仲明、德平人。萬歷癸未進士。改庶吉士。授檢討。有太史集。

讀二疏傳有感

翩翩雙引出長安。回首青蒲曉月寒。白髮最憐蕭太傅。中書未罷不辭官。

王萱一首

萱、字季孺。慈溪人。萬歷癸未進士。改庶吉士。授編修。

聖駕秋祀山陵兼擇壽宮恭紀

金支高映玉芙蓉。騎吹聲連長樂鐘。霜露九秋修祀典。山川百里闕靈蹤。龍旂展轉清颿度。鳳輦歸來瑞靄重。嵩祝祇今稱萬壽。石門好與白雲封。

# 明詩紀事卷十四下

庚籤

閃繼迪一首

繼迪字允修保山人萬歷乙酉舉人除□□學官歷翰林院孔目遷吏部司務有兩岑園秋興吳越遊草

山陰道中

於越山川范蠡城家家碧水浸軒楹舊聞萬壑千巖勝今傍三峯八洞行禹績會同餘想像霸圖生聚費經營荒煙銷盡興亡迹莫怪羲之少宦情

陳翰臣一首

翰臣字子卿莆田人尙書經邦子萬歷乙酉舉人有三秀集木齋集北遊草

黯淡灘

溪迴石瀨長崖束灘聲壯中流一葉下天地爲簸蕩歛如奔電掣駛若輕弩放欹傾破層湍冥迷出高浪跌頓久未定相顧色沮喪甯獨瞿塘惡膽落不可上誰能鏟危石坐使洪流暢

曾仕鑑四首

仕鑑字明吾。一字人倩。南海人。萬歷乙酉舉人。授中書舍人。遷戶部主事。有慶歷公車。羅浮和杜諸集。

梁九圖嶺表詩傳。人倩近體時露警拔。

送任陳二子西游

兵後同爲客。悲秋奈別何。一尊停桂水。雙劍指牂牁。世已輕貧賤。吾將老薜蘿。飄然各歧路。去矣慎風波。

奉懷沈純甫

未是埋輪去。如何請劍頻。大臣方泣血。小吏敢批麟。放逐懷明主。行藏鑒古人。譴深非獨汝。心折更都勻。

寄陳士鶴

聞君剖竹夜郎西。家遠天南不易攜。籍占粵人迷漢語。市通金齒譯雕題。花間負弩驅馴象。夢裏看山賦碧雞。歲晏獨愁書阻絕。嶺南關樹故淒淒。

展于少保墓

塚樹陰陰掩翠微。旌功祠下一沾衣。金縉遠暨南遷誤。玉輦親迎北狩歸。五相不辭滄海死。漢王宜出白登圍。翻憐鄂墓西湖近。今古英雄涕並揮。

奈祖頤一首

祖頤字于正，廣州順德人。萬歷乙酉舉人。除蘭陽教諭。

別劉抱白練師遊楚

瀟湘西去路漫漫，拄杖秋煙岳色寒。七十二峯雲影外，不知誰共月明看。

黃居中二首

居中，字立父，一字明立，晉江人。萬歷乙酉舉人。除上海教諭。歷南國子監丞。遷黃平知州。不赴。有千頃齋集。

列朝詩集：明立專勤汲古，得異書必手自繕寫。僑居金陵，年八十餘，猶篝燈誦讀，達旦不倦。古稱老而好學，斯無愧焉。

靜志居詩話：監丞銳意藏書，手自鈔撮。仲子虞稷繼之，歲增月益。太倉之米五升，文館之燭一挺，曉夜孜孜，不廢黷勸。著錄凡八萬冊，墳土未乾，皆歸他人插架，深可惜也。

田按：尤西堂入史局，撰明藝文志五卷。後來史官以西堂所撰蕪雜荒謬，削去底稿，取黃氏千頃堂書目爲底本，以私家紀載而爲一代史乘之目錄，其收藏可謂宏富矣。

閏冬社集永慶寺因登謝公墩

覽勝腸如渴，沈陰約屢更。茲遊風日美，忽感古今情。雲物仍鍾阜，人煙尙冶城。未能忘小草，徒爾負蒼生。

答李與熙

明詩紀事 庚籤 卷十四下

故國煙霞舊。山園薜荔新。一杯風雨夜。應憶未歸人。



# 明詩紀事卷十五

## 庚籤

唐文獻一首

文獻字元徵。松江華亭人。萬歷丙戌第一人及第。授修撰。歷中允、諭德、庶子、少詹事、禮部侍郎、掌翰林院事。贈禮部尚書。諡文恪。有占星堂集十六卷。

王文肅文集元徵詩如襄陽、輞川筆法端楷。卽家報皆蠅頭細書。語語可訓。

## 擬青青園中葵

青青園中葵。綠萼映朱蕤。豈不盛繁華。但恨秋風欺。黃河向東注。白日駛西馳。逝川與流光。飄忽不可追。勉哉青陽子。努力須及時。

## 劉黃裳九首

黃裳字玄子。光州人。知府繪子。萬歷丙戌進士。授刑部主事。遷兵部員外。進郎中。有藏徵館集十六卷。

張佳胤居來山房集。玄子文詞。沈洋譎麗。

列朝詩集。玄子博學多聞。其詩才氣橫溢。苦無裁製。亦重慶之餘波也。

田按。玄子古詩。奇骨偉岸。但多鬱轆未宣。七律特有俊調。玄子贈弇州詩。稱太倉王夫子。歷下李先生。備極推挹。故元美引之。四十子之列。

寓懷

仰見秋空月。照此芙蓉池。紅芳本自淨。水光迸華滋。露下不聞響。羅衣潤始知。暗自氣化變。物生順四時。

塞上曲

幽并健兒北擊胡。結束羊裘效骨都。冑插銀貂馳代馬。鞞盤銅虎控遼弧。塞鴻列陣斷燕歌。草碧龍堆放駱駝。黃雲戍卒朝乘障。白馬將軍夜渡河。共推人馬爭挑戰。無奈天驕力請和。嫖姚旗指寘顏山。單于質子受降還。黃河水冷沈秦月。青海雲深護漢關。漢關秦月自年年。雷轟電掣樹燕然。天子龍顏欣曜景。將軍燕頰盡凌煙。

劉伶墓歌

古來劉生多好俠。酒酣便恣掀長鬣。沛中亭長運卯金。閉戶先生只書篋。我馬嘗黃走下蔡。海風吹天墮塵外。丈夫三十不封侯。苦酒堪將洗心肺。木落淮南見水汀。伯倫墳草隱山屏。有酒可澆墳上土。我問參軍魯已腐。黃昏客去淮水川。寺前寺後飛冷煙。此中若憶靈魂住。地底應須有酒泉。

八僊圖歌爲何郎題

躡躡雲外侶。八公集此堂。拍肩接手弄海日。龍情鶴態皆昂藏。九月霜花淨海島。一鳥東來報瑤草。霞裏吹笙行玉童。巨鯨驚走三山倒。何郎本是淮海仙。河上著書年幾千。朱顏不服寒石散。常坐青山吸紫煙。閒來爲賭金胎藥。日與仙人臺上博。有時青天跨白龍。萬里春風共寥廓。嵩岳蒼蒼起翠峯。遠連秋水照芙蓉。金機玉訣倚桂樹。飛天靈劍斫長松。各向湖中醉萬春。僊僊起舞妙通神。何郎風骨亦放縱。混入仙班作九人。

出京

西山三百寺。深負碧雲峯。馬上惟看雪。巖邊祇憶私。還慙遊鳥去。空羨野僧逢。如有妙緣在。乘時一往從。寄江陰張醕卿

秋懷

抗手離羣日。相看淚滿巾。燕臺饒凍雪。古寺足緇塵。江草帆千里。山蘿夢兩春。應知偕計近。又共謁楓宸。玄都殿在西北。虹渚星湖萬歲峯。實笑秦祠徵寶雉。還輕漢時見黃龍。金盃露碗收神水。玉帶風符護禁松。一自玄元歸碧落。瑤壇寂寂下宵鐘。

登大報恩寺塔

翠甌琉璃瑣上方。御碑寶契自文皇。赤烏舊有長千里。白象新開選佛場。下瞰山光來竹檻。遠移江色入松房。煙波極目愁無藉。嘯倚香臺望洛陽。

金碧臺讌集呈楊太史用修

盧橘芙蓉路欲迷。高臺疊石倚丹梯。漢家瑞氣迎金馬。蜀客僊才祭碧雞。萬里雲還連越巘。千年山自枕巴西。詞人況遇驅今古。此日登臨酒正攜。

送劉中丞遊峨眉

爲訪兜羅最上層。三峯遙已屬中丞。危旌知犯經年雪。孤策應尋出世僧。天近飛雲沈絕澗。江深片月挂枯藤。共言銀界通西域。得見寒光卽智燈。

安希范三首

希范字小范。無錫人。萬歷丙戌進士。授行人。遷禮部主事。改南吏部。以言事斥爲民。天啓初。贈光祿寺少卿。有《天全堂集》四卷。

田按：小范以疏論輔臣王錫爵挾私植黨。仇視正人。落職歸。時論譴之。所居膠山之麓。倚木千霄。碧流千頃。出則乘畫舫。列綺窗十二。圃陶元亮。張季鷹。蘇端明。米南宮諸賢其上。爲五湖煙水伴。遊屐多在天目。赤城。太湖七十二峯間。晚卜居湖州之笱山。又卜界中之桐城臨。茶香菊茁。時攜鑿罍就之。家居三十年。謝絕朝問。及光宗以李可灼進紅丸升遐。首輔方從哲護之。小范作詩志痛云。受遺元老仍增秩。進藥鴻臚也賜金。時稱詩史云。

龍井訪友元王隱君次屠緯真韻

挾策躡青蒼。空山罕人迹。藤蘿挂懸瀑。古今壓危石。仰望空翠中。靄靄孤雲白。山阿覬以深。幽人此棲息。松隙闢甕牖。湖光蕩虛壁。清言互酬應。嵐氣忽云夕。

朱君采侍御青蓮居

夙聞茗雪間。山水多清遠。詎意闔閭側。蓬瀛忽在眼。偶乘一葉舟。沿洄恣遊衍。輕飄偃菰蘆。微波蕩菱芡。叢篁雜灌木。森蔚屢回轉。中有伊人居。列戶抗遙巘。堂宇據勝開。樓榭隨意建。高閣俯喬林。羣峯歷可辨。憑欄耳目曠。隱几縹緗展。時報黃鶴駕。閒誦青華簡。客至輒披襟。參微語尤雋。余茲將卜鄰。栖託計非舛。

寄題五鹿先生五鹿山房

選地開三徑。爲園過一邱。山川通晉國。臺榭俯漳流。地學辛夷隴。花藏杜若洲。江湖懷魏闕。未許老菟裘。

田按。此題張平仲五鹿山房圖也。平仲名銍。大名人。圖凡六。卞華菴。沈石天爲勝。今藏余齋。

袁黃二首

黃字坤儀。嘉善人。萬歷丙戌進士。除寶坻知縣。遷兵部主事。有兩行堂集。

郝敬藝圃偷談。嚴滄溟借禪喻詩。近時袁坤儀卽禪爲詩。坤儀之說。可矯浮靡之偏。失詩人葩藻之意。

爛溪夜泊

載酒攜琴訪翠微。前邨燈火對漁磯。孤舟自傍蘆花宿。老鶴應疑道士歸。明月滿前春樹冷。好山猶在主人非。百年心事同流水。半夜聞雞淚滿衣。

林居

簾捲東風日未斜。松蹊竹徑野人家。空庭寂寞無人到。閒看黃鸝啄杏花。

王嘉謨一首

嘉謨字伯俞。直隸豹韜衛人。萬歷丙戌進士。除行人。遷禮科給事中。累官布政使。有薊邱集。

靜志居詩話。伯俞五言。精熟選理。

海淀偶題

燕市黃塵影。無人驚日斜。半程西郭地。一水隔山家。荒竹抽高筍。野桃報晚花。丹青多殿閣。只此似京華。

吳應賓一首

應賓字客卿。桐城人。萬歷丙戌進士。改庶吉士。授編修。天啓初。以理學召。不赴。加左春坊右諭德。兼侍讀。門人私謚宗一先生。有學易齋集。

李公麟

居士龍眠圖丹青妙天下。有時寂住峯。側耳浮山話。誰云履半穿。天遊臥清暇。

王一鳴二首

一鳴字子聲黃岡人萬歷丙戌進士除太湖知縣改臨漳有朱陵洞稿

田按子聲稚欽從孫湯義仍贈詩云爲憶先朝王夢澤烏衣殊不羨江東子聲負才不得志卒義仍有先寒食一日同張了心哭王太湖詩云張衡愁處起離情不見黃州王子聲絮酒隻雞千載事楚天明日是清明

便民倉是縣漕米入江處時方憂旱

修竹迴斜徑高蟬噪夕陽數行遷客淚一灑便民倉剝肉知何補勞心或自傷驕雷燔赤日念爾稼登場  
十載

十載猶遷客孤蹤愧俗人長絨存後舌乍保爨餘身楚澤雲千里春城月半輪潛夫潛未得飄泊損天真  
周獻臣一首

獻臣字竅六臨川人萬歷丙戌進士除太康知縣改許州學正入爲國子博士遷南刑部主事謫福建布政司檢校遷龍安推官有鸞林外編

發黃塘橋經西津渡

歸雲銜嶺半樓碧遠水浮天一村白何處山椒響暮猿天涯腸斷未歸客

張文柱一首

文柱字仲立。崑山人。士淪子。萬歷戊子舉人。官臨清知州。有溟池集十六卷。

玉筍詩談。仲立入青溪社。年最少。詩清新俊逸。

列朝詩集。仲立年十二。賦關山月詩云。閨裏紅顏愁少婦。塵邊白骨怨征夫。一座嗟賞。孫齊之曰。仲立才高。靡發。託意幽玄。正如冰壺秋月。本宜著煙霞外。迺強使適俗。故少年卽有子建憂生之嗟。

市隱園鷗波

聞道午橋莊。中連谷水陽。主人滄海意。都與白鷗忘。沙合寒煙積。磯深夜雨長。江頭風浪惡。常得聚迴塘。



# 明詩紀事卷十六

## 庚籤

焦竑三首

竑字弱侯。南京旗手衛人。萬曆己丑第一人及第。授修撰。謫福甯州同知。天啓初。贈諭德。福王時。追諡文端。有澹園集四十九卷。續集三十五卷。

靜志居詩話。修撰晚擢魏科。仕雖不達。公望歸之。亳州李文友仁卿詩云。文章南國多門下。翰墨西園集上才。蓋實錄也。詩特寄與。若儲書之富。庶幾中簿。多手自抄撮。惜近年俱散佚矣。

田按。弱侯爲東宮講官。是時太倉當國。謂元子冲齡典學。當引進圖史。弱侯輯古儲君事。可爲法戒者。繪圖衍義。名曰養正圖解。擬進之。同官郭美命輩惡其不相聞。自爲賈譽。賢者乃相阨如此。弱侯著述甚富。小詩亦有清放之致。

## 同李比部永慶禪房小集

一笑同幽事。移樽向夕陰。輕風吹片雨。蕭颯動高林。自愛邱中賞。還同澤畔吟。相看意不盡。冷露滿衣襟。

## 莫愁湖

水闊菰蒲淨。城開睥睨斜。懷人倚高閣。落照下平沙。眉黛餘山色。鈿金但野花。徘徊湖上景。一倍惜芳華。

靈谷寺梅花隴二首

山下幾家茅屋。村中千樹梅花。藉草持壺燕坐。隔林敲石煎茶。蘼蘼林東短牆。曾開寶地齊梁。初春老樹花發。深澗無人水香。

陶望齡五首

望齡字周望。會稽人。萬曆己丑第三人及第。授編修。歷中允。諭德。遷國子祭酒。諡文簡。有水天閣集十卷。歇庵集二十卷。

黃汝亨寓林集。周望詩爲陶爲柳。問爲長吉。品置泉石。嘯吟煙雲。超如也。

列朝詩集。萬曆中年。汰除王。李。結習。以清新自持者。館閣中平倩。周望爲眉目。

靜志居詩話。周望早年詩格清越。超超似神仙中人。中歲講學逃禪。兼惑公安之論。遂變去夫。義豎面目。白沙在泥。與之俱黑。良可惜也。

田按。公安楚咻。始於伯修。黃平倩。陶周望與伯修同館。聲氣翕合。中郎稍晚出。推波助瀾。二人益降心從之。是時臺閣中惟于文定。馮文敏雅能自持。然才稍不及黃。陶世論惜之。

紫閩有序

泄之水。百仞五之。意是天上落也。從響鐵嶺而登。至絕頂。謂便當下。乃忽見平疇長林。桑竹翳。溝塍組織。水皆安流。審之卽墮。而爲泄者。地名紫閩。民居頗稠。或至巨富。四望緬然平遠。亦更有

羣峯環之。上山卽富陽縣界。由此言之。安知今所謂大地者。非處於孤峯絕頂乎。  
一瀑懸百仞。五瀑方到地。每緣嵐霧開。略想峯頭翠。卽此料泉源。應從白雲墜。攀藤漸躋陟。屢息始能詣。  
誰謂孤峭中。忽有桃源事。雞犬散村落。竹木成位置。連疇溪女桑。卓午樵人市。向來五瀑布。平流若溝澗。  
十里方下山。人家在天際。

題水亭圖有序

南京春官尙書宅在柳樹灣。池館清迥。余與繼源讀書其中時。嘗見此圖。別後二十年。始會於北  
都。繼源復出此求詠。追記舊遊。宛宛在目。人事變徙。悵然而悲。會予復告歸。又二年丁酉。始書此  
寄呈繼源於南京。崔顥題詩在上頭。莫訝羞澁難出手也。

昔年夢墮鍾山下。古柳成衙壓官舍。水檻臨池竹亞牆。共君杯酒燒燈夜。君持此圖臨檻前。水亭水檻都  
依然。真景如攢畫景闊。折葦欹蓮一色天。生綃尺五卷成束。燼罷燈花觀不足。妙畫有神情恍惚。吹燈走  
入圖中宿。一別廿載逢燕都。一頂紗巾尙未除。重爲披圖向燈下。可惜圖在風景殊。昔我兄弟皆少小。君  
纔有髡似寒草。人言絹力苦不長。墨色翻如昔年好。卻憶孤雲鎮東事。妙手相遭偏得意。亭館涼深墨瀋  
濃。略寫清幽記殘醉。我無手筆比孤雲。難把煙光寄贈君。柳樹灣頭君憶取。秋風好爲悵離羣。

陳侍御西湖莊

名場羨爾一身收。墨詔新銜拜醉侯。艇子舊裝蓮葉樣。吳兒殊有串珠喉。輕輿輓選花間馭。晚翠朝煙水上樓。我亦清狂公記取。十旬三度淨慈遊。

東山

竹梢藤蔓冷僧扉。門外蒼松忽減圍。斲藥更誰悲遠志。摘花猶得訪薔薇。落潮漁艇晚初關。上浦風帆健欲飛。絲管暮年陶寫盡。謝公何日復東歸。

與季豹遊雲門

叢竹生鞭晚稻齊。石橋重訪古時題。谷雲未出俄成雨。簷瓦初鳴已漲溪。日氣忽穿殘蜺斷。亂山翻在夕陽西。秦碑解讀隨君讀。苔磴從高不溼泥。

黃輝十一首

輝字昭素。一字平倩。南充人。萬歷己丑進士。改庶吉士。授編修。歷中允。諭德。庶子。少詹事。兼侍讀。學士。有鐵菴集八十卷。平倩逸稿三十六卷。

袁中道珂雪齋集。萬歷戊戌伯修。中郎皆官吳門。予入太學。平倩從蜀來。聚首最密。中郎作詩。力破時人蹊徑。多破膽險句。伯修詩穩而清。平倩詩奇而藻。兩人皆爲中郎所轉。稍稍失其故步。

松應集。平倩大隱金門。有超世之志。人擬之蘇眉山。黃涪州兩學士。

列朝詩集。己丑同館者。詩文推陶周望。書畫推董玄宰。平倩之詩與書。與之齊名。其後與袁伯修。中郎兄弟。研窮性相之宗。所

至遊覽山水。尋訪禪衲。雖居華要。有道人雲水之致。

田按。平倩詩爽雋絕倫。惜爲公安習氣所染。余擇其近雅者存之。不愧當時才子。

### 石鼓歌

成均橋門列者石。相傳周宣員獵迹。翁勃時時雲氣生。倒薤依微破苔隙。彷彿媧皇五色墮。錯落星辰尙堪摘。此時閱人人遞喜。昌黎先生好尤癖。可憐光價絕鼎鐘。霜草風沙無憐惜。元和到今復幾歲。流落尤能脫白碣。金繩斷鈕玉柯迸。蟬揚何繇見光澤。孔子刪詩偶遺漏。不緣片碣誰搜彙。或疑成後蒐岐陽。椒舉之言具楚籍。車攻卽類宣王詩。四牡東徂豈西適。周家蒐苗世有事。平岐臧維定何擇。大篆分明史籀手。詛楚卑卑其能役。況復李斯七日歎。弱骨今猶植碣嶧。此書穆滿當伯仲。爭令支孽掩宗祏。宇文偏陋復安取。一笑豎儒揣量窄。甄豐奇字誠辱收。六體粗堪證今昔。位置何須爭甲癸。參差枉自疑君帛。從教缺剝費摩挲。古意居然存者碩。顯晦隨人亦有時。一出雍涼幾爲客。小雅終存王者氣。夜夜精光岌相射。護持豈爲耽奇字。想像中興在明辟。方今太平無一事。風雅葳蕤孰攬撫。但令夢寐到成宣。隻字猶堪動心魄。老生更訪吉日碑。剔盡崑崙亦何益。嗚呼石鼓歌成誰獻聞。槐市陰陰土花碧。

田按。明人詠石鼓詩。大復而外。此爲傑作。

### 詠史

吾憐東方生。辟世金馬門。滑耀時若詭。委蛇體自眞。猥以龍變姿。而偶郭舍人。竊酒戲萬乘。折簡調平津。繆巧固無端。諷諫難悉聞。壯哉割肉手。何有瑤池春。濯衣紫海遙。長嘯流清塵。歲星去幾時。青蠅遽來臻。太息巫蠱冤。何用千秋伸。

滴水巖

晨雨洗秋碧。千峯寒古苔。雲盤小馬入。河折大龍迴。源水不知處。澗花相喚開。茫茫塵劫事。問取石林灰。

白沙驛

山驛冷荒荒。昏煙帶葉黃。窗交蛛網月。垣隙虎蹏霜。攜手同人盡。迴身獨夜長。佳期惟有夢。夢去轉蒼茫。

西瀼杜少陵祠

出峽是何意。栖巢仍戀枝。不應三畝券。買得古今祠。淺泊龍猶悔。孤鳴雀自悲。祇應離芷近。屈宋有前期。

猗臺用米仲詔韻

出郭逢人少。投林駐馬偏。楊花騰野雪。竹葉擁溪泉。往事柴門月。餘春麥隴煙。故山差髣髴。昨夜夢嗁鶻。

永福菴待舍弟不至

已謝青門路。惟餘白社緣。澗聲秋樹雨。山色暮樓煙。劍閣嗁烏外。蘆溝落雁前。池塘空復夢。何日對床眠。

宿闕鄉時河南歲荒甚

周原秦塞兩蒼茫。徙倚桃林正夕陽。真氣西來千嶂紫。濁河東去六州黃。何堪大澤哀鴻雁。耐可重關踞虎狼。虛博探風隨堠吏。龍泉賸有舊時裝。

西陵別中郎小修

山陽殘淚溼征衣。此別深憐舊侶稀。與我周旋明日始。爲誰流浪十年歸。采蘭自有山中樂。抱甕原無世上機。巴蜀音塵同梗泛。峽魚西上雀東飛。

沔縣武侯祠

丞相棠陰此地偏。幾人揮淚定軍前。千秋信史猶生氣。六尺寒碑自暝煙。棧閣經殘流馬路。干戈愁絕臥龍年。雜耕嘔血成何事。重爲英雄一慨然。

入峽書懷

華髮還來照玉溪。斑衣常是夢中噓。孱陵尺素何時到。家在相如客舍西。

馮從吾一首

從吾字仲好。長安人。萬歷己丑進士。選庶吉士。改御史。削籍歸。起尙寶卿。進太僕少卿。均未赴。改大理。擢左僉都御史。進左副都御史。乞歸。起南右都御史。未上。召拜工部尙書。尋致仕。以忤閹黨。削籍。崇禎初。復官。贈太子太保。諡恭定。有少墟集二十二卷。

田按前明吾黔有二驛丞皆能提倡聖學興起後進王陽明爲龍場驛丞人所共知也繼之者有三原張原以吏科給事中言事忤旨謫新添衛驛丞學者聞公名裹糧負笈經所指授充然有得士風爲之一變此事見明史及少墟文集吾黔省志於新添設驛丞且不能詳鄒漢績輯貴陽府志添謫宦一門亦不能知張公事余讀少墟集爲紀其詳如此

涇野呂先生

涇野呂夫子矯矯崇正學挾册遊成均馬崔同切琢馬谿田射策冠時髦聲華何卓犖慷慨批逆鱗封章凌五嶽講學重躬行乾坤在其握吁嗟橫渠後關中稱先覺

高攀龍七首

攀龍字存之無錫人萬歷己丑進士除行人謫揭陽典史起光祿寺丞進本寺少卿歷太常少卿大理少卿進太僕卿乞歸起刑部侍郎進左都御史坐忤逆闖削籍被遞赴水死崇禎初贈太子少保兵部尙書諡忠憲有高子遺書十二卷

四庫總目攀龍詩意沖澹

靜志居詩話先生天下規矩援世翼教不以聲律自繩然與歸待詔訂金石契宜同心之言自成蘭臭也

田按先生再起侍郎時魏闖勢方張福清當國先生曰外廷法用正直內閣法用和緩內閣當借用外廷不可以正直而疑其激外廷當實成內閣不可以和緩而疑其媚苦心調劑至福清去而國事不可爲矣先生又曰中官用事未能拔其毒且須殺其毒宜如歸德相公勸化諸璫勿與吾輩爲敵然先生不攻逆闖而攻附闖之崔呈秀捋虎鬚取虎子禍均不旋踵矣



水居

微雨乍過好風徐來。游雲斷續。衆峯皆開。歡然撫景。盡茲一杯。世事如積。亦已焉哉。

山居

城郭多塵事。入山意始豁。炎暑絕尋遊。芳園轉閒潔。拂簟臥看雲。漱泉滌煩熱。疏林來遠風。虛堂入新月。湛湛無交心。端居見超越。百營良有極。庶以善自悅。

采菊

天地有終極。人生豈常爾。年壽不可知。富貴焉足恃。昔爲春原美。今隨秋草薤。四時更代謝。百年遞成毀。區區世人心。詎能遠物理。所以采菊翁。悠然了斯指。

送辰州守瞿元立

秋至林薄佳。幽人自怡悅。閒尋山中侶。偶坐松下石。一酌清冷泉。滌茲當午熱。自餘無一事。於性有至適。云胡同心人。簡書迫行役。我欲賦招隱。言念斯民厄。以君之操持。所至有膏澤。誠然振五品。何必恃三尺。郡齋有餘閒。卽是林間客。得意且歸來。共泛五湖碧。

發光山中

時穿深竹坐。人境忽如失。落日照前山。松間一僧出。

有客

偶隨白雲出。不掩白雲扉。有客坐來久。山僧歸未歸。

水居漫興

黃葉疏疏門巷。寒風淅淅蒹葭。人在小樓隱几。夕陽忽度昏鴉。

劉文卿一首

文卿字後如。廣昌人。萬歷己丑進士。除金華理官。擢吏部主事。改刑部。遷南兵部員外。天啓中。贈光祿少卿。有直洲集十卷。

春日由鹿田寺入冰壺洞

幽澗曲相引。因君逸興賒。林香侵淺草。水色映初霞。嶺盡樵歌斷。巖深鹿跡斜。淮南多隱思。叢桂幾時花。

祝世祿一首

世祿字無功。德興人。萬歷己丑進士。除休甯知縣。擢南吏科給事中。就遷尙寶卿。有環碧齋集六卷。

遊芝山

溪山春正半。載酒上空亭。取醉非吾事。乾坤忌獨醒。

林堯俞五首

堯俞字咨伯莆田人萬曆己丑進士改庶吉士授檢討歷贊善諭德南祭酒乞歸起禮部侍郎進本部尙書加太子太保諡文簡有谿堂集

靜志居詩話陳文定善書嘗以南祭酒奏續之京王振致酒幣請書程子四箴文定書與之而卻其幣論者譴之亡友莆田林嘉瓚字衡者述其從祖文簡公亦善書法魏忠賢敦請不與忠賢矯詔命公題扁公大書畏天堂三字題曰禮部尙書某奉旨書時忠賢出餅略公云出手製公以南人不慣食麪辭忠賢方銜之公遽請歸里陛見德陵謂曰長尙書乃欲歸邪賜之蟒玉以公儀表頎而長也若兩公者明哲保身淵然不可犯士大夫當以爲師林子又言公五言律原出右丞誦谿堂集信衡者不我廷也

蘭陔詩話文簡忤魏璫不止書扁一事德陵欲增閣額文簡力爭及會同選閣日忠賢欲據中坐文簡正色曰公等原由本部選進安可一旦輒相躋躐命移席分置兩柱間忠賢大愠又嘗作詠炭詩云正是高寒欲雪天聊爲置汝鐵鑪前應知倏忽陽和候變作寒灰火不燃爲人所傳誦忠賢益銜之文簡見幾遠引其門有車馬客一詩蓋自道也

門有車馬客行

門有車馬客云自洛京回洛京盛簪組道路滿塵埃朝趨丞相府暮入金銀臺時事易反覆人情多傾危對面等殊域貌語恆中乖誰能兩調劑耦俱無嫌猜以茲坐歎息不如反蒿萊入門見密親各敝生平懷當杯詎辭數懼言有餘談無爲念疇昔愴惻令心哀

春園雜興

蓬門一徑遠，茅屋數間斜。得雨新移竹，分泉細校茶。山僧來遠寺，尤酒餉鄰家。未識春深淺，臨風問落花。

宿碧雲寺

駐馬憶曾到，重來經十年。魚閒猶在藻，僧老坐安禪。曲水通山竇，疏檣染竹煙。夜深清磬發，隨意石牀眠。

焦山

高士何年隱，芳名留此山。至今洞壑裏，終日水雲閒。鶴瘞銘猶在，僧歸戶不關。無因留信宿，一棹唱風還。

姑蘇夜泊

吳閫今夜月，客思倍淒淒。到岸鐘聲斷，橫橋樹影低。臺荒悲鹿走，曲豔聽烏棲。欲趁靈岩約，雲深路復迷。

傅新德二首

新德字元明，定襄人。萬歷己丑進士，改庶吉士，授檢討。累官國子祭酒，贈禮部侍郎。諡文恪。有文恪集。

送孫湘山

鬱鬱園中葵，丹榮媚朝陽。朝陽條西傾，遊雲掩其光。春華不須臾，零露淒以霜。搖落易爲感，離人多慨慷。踟躕餞歧路，雲鳥爲徬徨。臨觴慘不歡，鳴琴發清商。別促憂日短，會難苦路長。代馬依朔風，鴻雁杳三湘。

丈夫志四海。誰謂天一方。但願崇明德。無爲情內傷。

書王孝子代母死賊册

黑風吹海海水立。長鯨跋浪天無日。江南處處屯妖氛。爺娘妻子走相失。孤鳳將雛值羅弦。猛虎食人無豪賢。倉皇挺身乞母命。見母不見戈與鉞。孝感山頭烏鳥唱。閭里至今色惆悵。何處看君死孝心。東嶠杳杳海日上。

馮有經二首

有經字正子。錦衣衛籍。慈溪人。萬歷己丑進士。改庶吉士。授編修。歷中允。諭德。庶子。贈禮部侍郎。龍華寺

湖際先朝寺。幽棲省物情。磬聲松下靜。鳥語竹間清。菰米羞首飮。園葵薦露羹。重來知幾日。虛負老僧盟。雲居寺

青青岑嶂切天開。澗石縈迴半隱苔。松下覆茅精舍出。花間紆徑遠泉來。經思劫後存無恙。塔想生前願可哀。洞去火龍香去樹。雲居日夕隱風雷。

方大鎮一首

大鎮字君靜。桐城人。萬歷己丑進士。除大名推官。擢江西道御史。遷大理寺丞。進本寺少卿。有甯

澹居詩集

靜志居詩話。少卿與鄒忠介、馮恭定、高忠憲、顧端文諸公講學首善書院。書院毀。箴得同人于野。遂乞休。自號野同翁。年七十。廬母墓而終。鄉人私謚曰文孝先生。其歲杪聞召詩云。仕途百折如浮海。客邸孤蹤似出家。足以占所守矣。

長安春興

蓬萊日轂擁天顏。玉殿高居霄漢間。宛馬如雲羅紫塞。黃金爲土貢青山。繭絲使者貂冠出。露布將軍鵠印還。正是平陂憂十漸。袞衣曉夜不曾閒。

章士雅一首

士雅字循之常熟人。副使美中子。萬曆己丑進士。除嘉善知縣。入爲刑部主事。改南工部。歷郎中。有薄遊小詠。

紀懷

江城二月客衣單。況是春風十日寒。鄉國梅花開欲盡。不須橫笛倚朱闌。

莊天合二首

天合字德全。長沙人。萬曆己丑進士。改庶吉士。授編修。累官少詹事。兼侍讀學士。贈禮部侍郎。有莊學士集。

病起懷故園

歲序駛如電。疾疢空相尋。春華坐消歇。庭柯散清陰。感此不自持。悠哉懷故林。湘月澹疏竹。衡雲低素琴。結茅流水間。意與澄波深。如何久離別。負此濠上心。耿耿向天末。能無莊鳥吟。

春閨怨

等閒見花開。等閒見花落。閒卻紫羅衫。春來不曾著。

戴士衡一首

士衡字章尹。莆田人。萬歷己丑進士。除新建知縣。擢吏科給事中。謫蘄州判官。改陝西鹽課副提舉。未赴。遣戍廉州。天啓中。贈太僕少卿。

過揚州偶成

廣陵濤色帶邗溝。世事驚心問野鷗。詞賦只今傳水部。風煙應不記迷樓。舊堤楊柳曾名曲。新嶺梅花半是愁。二十四橋看欲遍。簫聲明月爲誰留。

郝敬一首

敬字仲輿。京山人。萬歷己丑進士。除措雲知縣。改永嘉。擢禮科給事中。改戶科。謫宜興縣丞。歷江

陰知縣遷行人司副有山草堂嘯歌二卷。

田按仲與九經皆有解釋其論詩文有藝圃僉談四卷謂古詩四言太音冲漠漢魏增一言便多逸響如兵法改車戰爲步騎龍虎風雲奇變百出更增七言如長驅野戰又謂少陵詩如王郎酒酣拔劍斫地歌莫哀與太白詩蜀道難天姥吟北風行等篇氣格壯麗雅意澹微大抵以四五言束縛千古之詩人溢出一字便爲不雅固哉仲與之言詩也其所自作殊多淺率不副其言。

山莊卽事

嵐光拂曙影童童。春氣薰林林欲紅。隔浦人來呼渡子。看花客到問園公。苦吟得句逢春草。行樂無心過水東。酒伴城中勞折柬。柴車巾破畏天風。

陳所蘊一首

所蘊字子有。上海人。萬歷己丑進士。授南刑部主事。歷員外郎中。就改吏部。出爲湖廣參議。歷大名。河南副使。河南參政。乞歸。起山西按察使。不赴。再起南太僕少卿。有竹素堂藏稿。續稿。

乞歸未遂

忽忽吾何意。長歌懷隱淪。出真成小草。積竟是前薪。濩落悲吾道。支離笑此身。菟裘營已久。生計足垂綸。

陸彥章一首

彥章字伯達。松江華亭人。尙書樹聲子。萬歷己丑進士。除行人。乞歸。起光祿寺丞。遷本寺少卿。改



太僕少卿引疾歸起光祿寺卿不赴再起南刑部侍郎未上卒有讀書園集

田按伯達登第文定遺書戒之曰於家則疑盈滿於國則妨英俊毋趨捷徑毋嚮樞門乃吾子也伯達上官僅二年乞終養歸文定卒伯達廬墓側告墓曰生爲祝聖之民死作依親之鬼山川草木實聞此言福清執政高其節卽家拜光祿寺丞再遷官引疾歸啓禱兩朝再徵未上卒世稱伯達難進易退綽有父風

### 答周翰使君

玄亭東眺白雲多載酒其如興盡何惟有相思無近遠秋風吹夢渡黃河

### 鄭明選三首

明選字侯升歸安人萬歷己丑進士除安仁知縣擢南刑科給事中有鳴缶集

列朝詩集鄭君詩殊有俊氣

靜志居詩話先生五言近體全學高遠夫七言近體全學杜子美語不求工而句鍊字鍊卓然名家

### 歲暮卽事

臘盡休公事無人早閉門鉤簾看竹樹筐果散兒孫晴雪留階溼寒煙渡水昏雞棲江色暮返照落清尊

### 病中憶沈長山別業

不識田園近若何洛陽歸興日蹉跎舊時野竹平安否清夜山猿入聽多病惜餘生仍皓首老將吾道寄滄波風流況有詩朋在月白花香對朗歌

溪望

金蓋山前綠水橫。下菰城北碧雲生。酒船亂逐晴沙集。漁網徐牽細浪行。盡日盤桓從性懶。百年蕭散覺身輕。已將杖屨遊方外。婚嫁何須學向平。

萬嗣達一首

嗣達字禹存。德化人。布政使衣子。萬歷辛卯舉人。累官雲南金滄道副使。

廬山歌

廬山九疊雲錦屏。高逼清虛窺帝庭。白鹿未歸丹石杳。黃龍長去碧潭腥。岩僧乞食來天竺。山鬼吟詩潛石屋。洞口層冰六月寒。山腰倒景千年瀑。渺渺仙源信可求。青松白石總丹邱。何時一杖雙峯頂。長與盧敖汗漫遊。

張民表一首

民表字林宗。一字武仲。中牟人。萬歷辛卯舉人。有原圃塞菴詩集。

列朝詩集。林宗性嗜古文詞。藏書數萬卷。手自點定。喜飲。及草書。飲少許。卽頽然揮灑。放筆謂有神助。任俠好客。老而彌甚。時蕩舟於中牟郭外之南陂。無日無客。無客不醉。頂高冠。飄二帶。帶上繡東坡半升。僅漉淵明酒。三寸綫容子夏冠之句。乘敗車。無頂幔。一老特牽之。朗吟車中。每日醉陂頭。老杏下。門人子弟扶掖而歸。兀傲自放。世莫測其淺深也。崇禎壬午。寇圍大梁。

林宗勸當事密檄左甯南趨大梁。背北城而陳。通黃河一線以爲餉道。又當令陳永福兵列城外。勿聽入。入則城中餉竭。勢且民與兵俱盡。皆不聽。寇暫卻。或諷之曰。盍去諸。林宗曰。死則死耳。奈何去以爲民望乎。圍城五閱月。日夜乘石。拮据行間。汴人倚之。皆守死不去。賊決水灌城。背負其先人神主。抱詩文藥二尺許。登木筏。鄰並求登筏者益衆。林宗不忍卻。移筏就之。筏且沈。乃移筏登屋。屋上人垂綆相接。林宗羸且乏食。數上下者久之。水大至而沒。次子允準及門生文大士皆從焉。

書影。阮太沖。王季重皆測人。俱生於都門。張太保公爲鷹卿時。林宗先生侍養都門。三公垂髻。共硯席於演象所。常合刻其詩文以行。後太沖因嫩生光之變。移家尉氏。時時過會城。宿林宗先生長欄中。予時讀書其地。見兩公雄談竟夕。如少壯時。太沖常呼張曰。張仲爾。一生爲詩。惟得草細吳門棹。煙傷楚澤吟二語耳。張曰。跛君欲吾稱爾。湖回遠嶼青。日簸驚濤紫耶。太沖晚年足不良於行。故張以跛君戲之。

田按。林宗爲太保孟男子。崇禎壬午。汴城陷。沒於水。大梁周亮工。林宗弟子也。國變後。屬趙雪江圖。林宗像授其子子願。遍徵題詠。余得藏之。詩多步林宗鄴城南寺壁上詩韻。亮工詩云。鄴下南頭寺。同來聽妙香。隨鐘攜竹杖。分佛臥藤床。破壁孤兒淚。長河一夜霜。鴻文與祕笈。蛟室可能藏。薛采詩云。鄭重山陽賦。征軺一瓣香。如生歌哭室。異姓兩風床。弔古疑前語。扶孤又幾霜。憐予久遁迹。攬鏡負行藏。黃景昉詩云。寂寞尙書後。猶傳劍履香。竟虛揚子宅。誰伴庾公床。酬字三千絹。墜甌五十霜。僅留詩種在。辛苦白嬰藏。顧夢遊詩云。汨羅同弔處。杯酒瀉蒲香。楚澤招魂些。秦淮遶笛床。情深千尺水。愁滿一頭霜。自逐巫咸後。三光日閉藏。張文峙詩云。公曾精梵理。功德舊聞香。繡佛淵明酒。飛花侍女床。授筆圖獅額。傳神染兔霜。此甯勞夢想。生死是行藏。杜濬詩云。猶見吹臺氣。長留泚水香。九歌揮酒盃。四海弔書床。開齋心如月。峻嶒而有霜。河洛高弟子。珍重十年藏。趙寶詩云。壇坵飯依久。終然闕瓣香。天涯瞻畫像。客淚灑胡床。衣褶疑露水。髭根半帶霜。騎鯨歸去後。文字老龍藏。許友詩云。破壁詩痕潤。羣花繞殿香。鳥噓千樹月。書亂一筐床。酒寂夢淩水。蟲寒語咽霜。夜寒風雨裏。光怪可能藏。

陳古白

文傳江左秀。情見宋中書。隔面雲千嶂。愁心髮一梳。良圖襄野牧。活計潁濱漁。儻欲枉相訪。嵇康候呂車。

# 明詩紀事卷十七

## 庚籤

### 鄧原岳十一首

原岳字汝高。閩人。萬歷壬辰進士。授戶部主事。歷員外郎中。出爲雲南僉事。遷湖廣參議。進副使。有西樓集十八卷。

小草齋集。汝高初爲詩。學鄭吏部。已又學七子。既而一意摹古。要以唐人爲宗。

蒼霞草。汝高詩甚銳。而氣深語沈。有瀟然之致。

白榆集。汝高詩。心靈骨峻。才雄思超。

田按。汝高詩。音節俊爽。長於七律。與謝在杭。徐惟和。輩結社。在杭推爲嘉隆後閩人之冠。假借云爾。余衡其才品。當在二人之次。

### 俠客行

結客不交遊冶郎。使酒不挾邯鄲倡。一片雄心貫白日。披肝瀝膽天茫茫。尋常殺人只寸鐵。杯酒殷紅化爲血。壯士借名仍借軀。不似君卿但脣舌。

送彭興祖之晉陽

北地風霜早。關門落葉稠。故人從此去。遠道不勝愁。匹馬寄嵐暮。殘雲石室秋。明珠須愛惜。取次莫輕投。

同林熙吉熙工王玉生徐惟和興公遊錦溪竹林

苦愛西溪竹千挺。修篁瑟瑟逗晴暉。石林空翠和煙潤。澗道流泉作雨飛。載酒偶隨芳草去。迴車猶惜白雲遠。山中桂樹堪招隱。矯首風塵幾是非。

渡錢塘江

十月繁霜夜浹寥。扁舟孤客欲魂銷。江干木下頻聞雁。浦口風來正上潮。南宋寢園雲漠漠。西陵松柏雨瀟瀟。塞垣戎馬無消息。北望傷心涕淚遙。

謁長陵

文皇定鼎壯燕幽。更卜玄宮枕上游。樂府舊傳朱鷺引。祠官親奉白龍旂。太行迤邐雲邊路。黍谷蕭條塞外秋。聞說關中胡馬動。三犁誰爲埽神州。

過表忠觀

一畝荒祠卽故邱。越王香火此湖頭。水犀獨擁三千卒。裘馬橫行十四州。畫拱秋風棲鳥雀。空山夜雨冷松楸。英雄已去殘碑在。山下寒泉空自流。

過清河開河工告成恭紀

聖祖園陵奠泗濱。百川長護屬車塵。艱虞正念衣冠地。開濟誰當社稷臣。高闕迴翔龍嘴月。濁流安穩鶴河春。年年霜露還供奉。極目祠宮草色新。

歌風臺

漢祖歌風有舊臺。雄圖零落委荒苔。百年父老思湯沐。此日樵蘇問劫灰。樊巷有碑荒草沒。沛宮無主野花開。眼前壯士今何處。寂寞長陵烏雀哀。

寄強善長

橫塘信宿繫蘭舟。風雨時時憶虎邱。徼外青山勞客夢。天涯芳草伴人愁。山連越嶺還爭險。水入昆明卻倒流。萬里閒關書一札。不知何處問滄洲。

越王臺懷古

日落汀洲江吐雲。君王遺殿晚氤氳。樓船北出鄱陽道。劍壘東歸威武軍。馬瀆潮平天外直。龍湫泉咽夜深聞。一時霸業堪蕭瑟。愁對青山越水濱。

春盡

客舍蕭條對夕暉。更堪春盡野花飛。馬蹏欲逐殘春去。不信春歸客未歸。

江盈科四首

盈科字進之。常德桃源人。萬曆壬辰進士。除長洲知縣。徵授吏部主事。累官四川僉事。有雪濤閣集十四卷。

袁宏道瓶花齋集進之詩。窮新極變。物無遁情。或有一二語近平近俚近俳。此進之矯枉之作。以爲不如是不足以矯近代浮泛之弊也。

靜志居詩話。進之與袁中郎同官吳下。其詩頗近公安派。持論亦以七子爲非。特變而不成方者。中郎謂其矯枉之過。所謂笑他人之未工。忘己事之已拙。文人通病。大抵然矣。

田按。進之才不及中郎。而近俚近俳。正復相似。今錄其明暢之作。

書思

萬里滇雲寄一官。天涯歸路正漫漫。荒煙遠浦迷春色。細雨孤城釀暮寒。鄉思隔年頻入夢。客愁向晚只憑欄。可憐寂寞誰相對。細把梅花獨自看。

昆山舟中睡起

旅泊婁江一日程。姑蘇望入晚雲平。天連海氣全低岸。潮挾溪流欲上城。客裏鄉心成遠夢。枕邊涼雨作秋聲。醒時自擬還山賦。麋鹿從來無俗情。

棧道



透迤棧道繞溪斜。樵戶茅堂見幾家。籬落荒涼荆棘裏。蜜蜂飛上野藤花。

### 讀張魏公傳有感曲端

子聖焉能蓋父凶。曲端寃與岳飛同。何人爲立將軍廟。也把烏金鑄魏公。

靜志居詩話。徐秀才善敬。可一日語予曰。周公謹小人哉。張魏公。朱子所父事。何可毀也。予曰。公謹三代直道之遺也。宋之南渡。將帥有人。可以戰。可以守。自寄闔外之權於浚。喪師動數十萬。元氣重傷。譬諸孱夫。不能復起矣。浚於李綱。趙鼎輩。則劾之。於汪彥伯。秦檜等。則竊之。尙得云好惡之公平。至曲端之誅。與檜之殺岳飛。何以異。而讀史者。務曲筆以文致端。有可死之罪。不過因浚有子稱講學。浚死。徽國文公爲之作狀。天下後世。遂信而不疑爾。中郎朱仙鎮詩。已極悲惋。不若進之詩。露膽張目。洵詩家之南董也。

### 畢自嚴一首

自嚴字景曾。淄川人。萬歷壬辰進士。除松江推官。徵授刑部主事。改工部。歷員外郎中。出爲淮徐道參議。改冀甯道。歷山西副使。陝西參政。按察使。布政使。召爲太僕卿。以右僉都御史巡撫天津。進戶部侍郎。督遼陽。再進右都御史。命掌南院事。就改戶部尙書。引疾歸。召拜戶部尙書。累加太子少保。太子太保。贈少保。有石隱園藏稿八卷。

四庫總目。高珩序石隱園藏稿云。自嚴官戶部時。於天下大計。朗朗於胸。屈指兵食款目。如觀掌紋。每入署。輿後置書二寸餘。日晡事竣。必諒書。漏下數刻乃歸。鄼侯劉晏。遂抽蠶。賈之蠶。實古來僅事。又稱其七言近體。分滄溟。華泉之座。又作第二序。擬

其文於韓蘇擬其四六於徐庾雖鄉曲之言未免稍溢而以經濟兼文章則自嚴要不愧也。

留計移疾獲請詠懷

觀光忝昔幸。解組嫌今遲。自嗟薑桂性。兼之蒲柳姿。七尺猥承匱。四牡幾載馳。晚荷儲精寄。尋綴紀綱司。祿厚責彌重。汲深綆難支。筋力空殫竭。膏肓悲暗滋。坐是乞鑑湖。煙水聊自怡。貝邱宵夢繞。岱麓春雲垂。永矢南郭隱。長謝北山移。

王樂善二首

樂善字存初。霸州人。萬歷壬辰進士。除行人。遷吏部主事。有鷓適軒詩稿。扣角集。

明詩統扣角多寓自傷不遇之意。

春宮曲二首

燕語花飛正斷魂。黃金枉費賦長門。淒涼莫恨嬋娟誤。不嫁呼韓卽主恩。垂垂楊柳繞橫塘。倚檻攀條暗自傷。卻恨不如風裏絮。化萍猶得伴鴛鴦。

張五典一首

五典字和衷。沁水人。萬歷壬辰進士。授行人。遷戶部主事。歷員外郎中。出爲山東參議。累官兵部尙書。贈太子太保。有海虹集。

山居

卜築幽岩裏。紆回一徑斜。林虛留鶴夢。壁古繡苔花。煖水浮溪荇。春雲濕澗沙。采芝隨鹿去。茅屋鎖煙霞。

李騰芳一首

騰芳字子實。湘潭人。萬歷壬辰進士。改庶吉士。授檢討。屢遷諭德。以擅去官降太常博士。再謫江西理問。起行人司正。擢少詹。遷禮部侍郎。改吏部。以憂去官。加禮部尚書。尋起原官。謚文莊。有湘洲集十一卷。

衡陽舟中

薄暮江煙裏。相看一解顏。浪鷗無定渚。霧豹有深山。過客東西老。孤舟天地閒。江流原浩浩。吾道自多艱。

王在晉三首

在晉字明初。濬人。僑寓太倉州。萬歷壬辰進士。除中書舍人。遷工部主事。歷員外郎中。出爲福建僉事。累遷江西布政使。以右副都御史巡撫山東。進總督河道。拜兵部。添注侍郎。進本部尚書。經略遼東。薊鎮。天津。登萊。改南兵部尚書。告歸。起南吏部尚書。就改兵部。召拜刑部尚書。改兵部。坐事削籍。有蘭江集二十卷。越鑄八卷。遼海集。

山行

谿聲混人語。清冷逸塵埃。隔莽爨煙起。當山竹牖開。小兒驅犢去。村嫗汲泉回。耕鑿此中足。桑麻遍地栽。

秋夜舟行至由拳

落日放舟菰渚青。雙雙鳧雁眠沙汀。清秋獨坐不成寐。涼夜一尊長自醒。殘笛風前弄楊柳。疏星水面來流螢。挂帆無恙杳然去。晴空漠漠滄江冥。

長途春感

竹籐行竈便爲家。野邸逢人問歲華。聞道江南春事半。木蘭花發在天涯。

石九奏二首

九奏字伯成。冀州人。萬歷壬辰進士。授大理評事。歷寺副寺正。出爲萊州知府。改兗州。歷開原兵備副使。進參政。有半園集。

囉噴曲

淮水東流急。郎乘淮上船。安得回棹風。一夜吹郎還。

無題

走馬章臺日已斜。當年心事託琵琶。春來惟有雙飛燕。猶認雕梁是舊家。

張三極一首

三極字□□臨清人萬歷壬辰進士官教授

新秋集顯靈宮分得墀字

物外逢迎好。雲林徂暑時。鳥聲移晚樹。鶴影上秋墀。捲幕開花薦。分觴泛羽卮。暮涼歸興促。莫遣酒行遲。

馬應龍一首

應龍字伯光安邱人萬歷壬辰進士官禮部郎中

送友之雲夢

二澤雄江漢。孤帆發上游。相逢原逆旅。悵別各驚秋。風咽蟬聲苦。波澄雁影浮。那堪回首處。雲滿仲宣樓。

張延登一首

延登字濟美鄒平人萬歷壬辰進士除內黃知縣擢兵科給事中累官右都御史贈太子太保諡

忠定有集

龍磨角用雪蓑韻

一水涓涓鑱谷口。東風吹盡改南薰。老龍何日磨雙角。穿破頑山兩道雲。

丁起濬一首

起濬字哲初晉江人萬歷壬辰進士歷吏部郎中南太常少卿累遷刑部侍郎

東南嶠外詩話。哲初不以詩名。林茂之曰。亦知哲初有古驛一燈深之句乎。牧齋求得全什。錄入列朝詩集。哲初官司寇時。治魏閣黨。蘇州織造李實嘗誣周起元。周順昌獄。刑部會鞠。擬大辟。懷宗意欲縱之。哲初執愈堅。懷宗大怒詰實。對曰。好生者陛下大德。執法者臣子職分。乃解。其立朝風概如此。

良鄉夜宿

古驛一燈深。蕭蕭車馬臨。薄寒添暝色。入夜動鄉心。戒寢預愁夢。喜晴翻量陰。首塗才此夕。忽漫話家林。

岳和聲一首

和聲字爾律。嘉興人。萬曆壬辰進士。除汝陽知縣。徵授禮部主事。歷員外。出爲慶遠知府。改贛州。東昌。遷福建副使。歷廣西參政。以右僉都御史巡撫順天。天啓中。起補延綏巡撫。有餐微子集三十卷。

田按。爾律出守慶遠。效范至能。作後驂鸞錄紀遊。頗稱好事。詩強作攀牙語。以翻李王窠臼。晚起撫延綏。時論薄之。吳次尾兩朝剝復錄云云。

從顧鄱陽公立年丈乞番君碑

番君尸祝自庚桑。雁影湖波共渺茫。懊恨無端趙松雪。一碑翻教令君忙。

徐必達一首

必達字德夫。嘉興人。萬曆壬辰進士。除太湖知縣。改溧水。遷南吏部主事。歷太僕卿。應天府尹。以

僉都御史擢督操江。就遷兵部侍郎。贈兵部尚書。有南州草。

南陵道中

登登不盡青山路。瑟瑟松風到處聞。飛鳥自來人自去。馬蹏蹴碎萬重雲。

陳懿典一首

懿典字孟常。秀水人。萬歷壬辰進士。改庶吉士。授編修。歷官少詹事。有吏隱齋集。

送錢滿如孝廉攜燕姬南還

歧路秋風思黯然。驪歌唱徹孝廉船。抱將楚璞何須泣。買得燕姬絕可憐。月夜鴛鴦雙綰帶。春風山水一調絃。壯心暫託當壚見。許待相如駟馬年。

潘榛一首

榛字茂昆。鄒人。萬歷壬辰進士。累官山西按察使。

露書鄒邑潘茂昆詩十一卷。余愛其人隨山勢高低住。門逐日光向背開。靈藥近生衙舍下。好山多在郡城邊之句。

題恩縣高閣

渾疑天咫尺。雲影漫相連。古道行人渡。長河估客還。重關矜十二。朱履故三千。不見平原塚。登臨一慨然。

